



391810

Mag. St. Dr.

III

2274 IV. S. II



Mag. St. Dr. III




Ex-Libris
PODHORCE

806



1

274558
①



FELICITAS PUBLICA
Ab inita auspiciatissimi Conjugii societate
inter

ILLUSTRISSIMUM DOMINUM
Dominum

STANISLAUM
RZEWUSKI

In Olesk, Podhorce &c. &c. Comitem,
Chelmensem &c. Præfectum, Palatini Podoliæ
& Ducis Exercituum Poloniæ Filium,

ac

CELISSIMAM PRINCIPEM
CAROLINAM
CATHARINAM
RADIVILIAM,

Palatini Vilnensis Exercituumquæ Litvaniæ
Magni Ducis Filiam, Poloniæ & Litvaniæ

COMMUNIS,

ab obligata Magnis Nominibus Societate JESU
publicis gratulationibus

EXCEPTA

Annô MDCCLIX Idibus Juniis.



VILNÆ Typis S. R. M. Academicis
Societatis JESU.



391810

III

Podh. 383.

Bibl Jag



DEDICATIO.

SPONSI FORTUNATISSIMI.

Cum ea sit mortalis vitæ istius conditio, ut nullum fere diem cuivis homini liceat exigere, quò illi molestiæ aliquid non accidat; tum verò, quemadmodum inter spinas nascuntur rosæ, ita inter calamitosos vitæ humanæ dies læti quandoq; soles oriri nobis solent, diemq; nulla mæroris nube aspersum, quin sereno etiam lætitiæ alicujus vultu conspicuum efficere: id quod nos tam proli-

*xè hodie in nobismet ipsi experimur: quàm
largè ex connubio vestro faustissimo, lætitiis
perfusi simus. Etenim cum ita à natura
conformati simus, ut in secundis rebus, &
ad voluntatem nostram fluentibus, omnes
magnopere gaudeamus; tum in iis præser-
tim, quæ ad publicam felicitatem pertinent,
non tantum optimus quisq; atq; sapientissi-
mus, sed omnes omnino homines majorem
in modum lætari consueverunt. Nemini
itaq; mirum videri debet, si in ista vestra ex-
pectatissima omnibus conjunctione tantam
hilaritatem omnia præseferant, ut non ho-
mines ipsi tantum, sed ratione etiam sensuq;
ac vitâ destitutæ res inusitatâ lætitiâ, quasi
luce quadam, compleri videantur. Tanta est
enim in conjugio vestro celebritas, tanta
Numinis providentia, atq; cum ea rerum
nostrarum consensio, ut tum de præsentī fe-
licitate inter nos gratulemur, tum complu-
ra hinc nobis polliceamur bona nascitura.
Lætitia quippe ista tam magna est, ut ipsa
se planè non capiat, nec ullis limitibûs con-
tineri queat, & pectoris latebras dedignata
in publicum erumpat; non enim exultandi
modum*

modum inveniunt, qui non mediocribus bonis exultant. Quod si verò vel ex ipso cuiusq; vultu luculentissima existant hilaritatis summæ indicia, & si quo pacto ad nostros animos aditus aliquis pateret; constaret profectò, nos non commune tantum cum aliis gaudium gaudere, sed neminem fortasse pari ac nos perfusum esse voluptate. Etenim si qua industria ingenii, si qua vis gratæ voluntatis, si quod officii genus in nobis reperitur; totum id vestrum esse, ad vos tot nominibus id totum pertinere fatemur; quot à vobis beneficiis cumulati, quot donis munificentissimis Radivillianis aucti, quot gratiis atq; favoribus tum ab hac Illustrissima, tum ab ista Celsissima familia sumus ornati. Non itaq; committere potuimus, quin tenui saltem isto conjugii vestri faustissimi præconiò summam nostram lætitiā animumq; erga vos summo opere propensum testaremur; præsertim cum singularis erga Societatem JESU vestra benevolentia, quaecunq; hoc honoris vestri rerumq; secundarum studium, non ingratè à vobis exceptum iri, certò nobis

promittat. Hoc verò obsequium universa
quidem Provincia nostra, ea, qua par est,
officiosi animi testificatione Vobis exhibet,
at præcipuam muneris istius partem ho-
noremq³, sua vobis officia deferendi, sumit,
vestrosq³ favores ac patrocinia nunquam si-
bi defutura ut vehementer desiderat, sic
polliceri sibi non dubitat,

Illustrissimo atq; Celsissimo
Nomini vestro immortaliter de-
votum, Collegium Radivilianum
Nesvisiense

Societatis JESU.



PANEGYRICUS



I quantum nos felicitatis publicæ
ex vestra, **FORTUNATISSIMI**
SPONSI, quam initis, enasei so-
cietate intelligimus; tantum ad
rem eandem explicandam faculta-
tis in nobis sentiremus inesse,
speraremus profectò, eâ, quâ su-
scipimus auspiciatissimum istud
conjugium vestrum celebrandum, ratione tum apud
vos officium posituros nos haud ingratum, tum o-
mnibus patriæ civibus, in primis Gentibus cum ve-
stra utriusque Familia conjunctis, rem præstatu-
ros jucundam. Verùm etsi nos medioeritatem nostram
cognitam penitus atque exploratam habeamus, atque
opus hoc ingenio non nisi optimè à natura compa-
ratò, atque ab usu & exercitatione probè instructò,
dignum esse probè cognoscamus; illud tamen ingredi
at-

atque perficere, ut nostrarum partium esse ducimus,
sic studium illi nostrum commodare, minimè vere-
mur, propterea; quòd cum dignitas Vestra, ac sin-
gularis quædam erga nos beneficentia id à nobis po-
stulet, tum verò summa Rei-publicæ; cuius nos ali-
qua utique particula sumus; felicitas id nobis omnino
svadeat. Tametsi enim & sit ea Nominis Vestri am-
plitudo, eaque Profapiæ claritas, & ea erga nos ve-
stra exstet munificentia voluntatisque, commodis
vobis non mediocriter addictæ, luculentissima signi-
ficatio, ut diem istum faustissimum, qui Vos felicissi-
mò amicitia indissolubilis connectit vinculo,
gratulationibus prosequi, Vestrarum laudum præ-
dicatione solennem agere, non æquum modò sed ho-
norificentissimum etiam sit nobis; tamen, quòd res
est, ad ejusmodi gratulationes atque lætitiæ signifi-
cationem, non tam Vestrò aliquò commodò
(quod apud nos summò semper fuit, sum-
mòque semper erit locò) quàm publici boni
studiò nos esse adductos, ut non obscure sentimus, sic
ingenuè necesse est fateamur, propterea; quòd vos
met ipsos ita quidem animò comparatos esse, vide-
mus, ut, sicut publicum bonum (quod hominibus
sublimi locò natis solenne est) propriis vestris com-
modis anteponere consuevistis, omniaque vestra ad
publicas utilitates relata semper vultis; ita non è ve-
stro aliquo emolumento sed è re publica; quæ vo-
bis inprimis est curæ; spectari atque æstimari gau-
deatis; & ut laudem virtute mereri, gloriosum Vobis
summopere ducitis, ita laudes Vestras prædicationi-
bus celebrari, per insignem modestiam alienum à vo-
bis esse velitis. Non dubitamus nos sanè, quin omnes,
Con-

Conjugium hoc faustissimum ad publica planè com-
moda esse institutum, summèque accomodatum, lu-
culenter intelligant; tamen quod nobis ea de re cogi-
tantibus in mentem venit: quantum in hortis, locis-
què ad jucunditatem & suavissimos fructus percipi-
endos apparatis, ornamentis atquè utilitatis arbores
habent, tantum Felicitatis Publicæ hoc Conjugium
nobis præsentare videtur. Si namquè id in horto
sunt arbores, quòd homines in Republica; non mi-
nus certè *commodum Reipublicæ* atquè *opportunum*
accidit conjugium inter vos constitui; quàm
congruum. Utile est, poni in horto arborem pul-
cherrimam juxta ac fertilissimam: magnum certè
illa arbor horto præstabit ornamentum, præstabit u-
tilitatem non medioerem; in Vestro Conjugiò è re
commodisquè Rei-publicæ spectato, quis duo hæc
summa esse non videat? Nos certè, ut, quanta in ista
amplissimarum Familiarum conjunctione publica in-
sit felicitas, pro tenui, atquè infirma parte nostra
commonstrare valeamus; *summam ex ea utilitatem,*
Summumquè ornamentum in universam Rem-publicam
proficisci, humili atquè imbecilla oratione nostra con-
tendemus.

An ullo ex fonte alio, non liquet, majora in
Rempublicam manent commoda, aut unde plura peti
possint ornamenta, quàm si inter cives talia instituan-
tur conjugia, quæ & hominum universè probentur
sententiis, & Superùm placitis confirmantur. Nam
cùm omnis respublica è consortione humana con-
stet; manifestum est, ibi cives gratiâ, autoritate, glo-
riâ, opibûsquè florere pulcherrimè, ubi fortunæ sibi
communes sint, animiquè vinculis amicitiae colligati

maximè teneantur. Non est sane, quod ea sibi civitas metuat, in qua rebus suis concordia sit præfidiò. Ita communitos adoriatur, licet, hostis: infestis undiquè telis oppugnet; dissipabuntur molimina, cedentquè irriti conatus sui omnes, ubi se in armatos amicitia impeerint. Hoc muro ipso Lacedæmones se maximè tutabantur: ejusmodi præfidiis Romana civitas tamdiu stetit, totquè gentes victrix sub jugum misit. Ecquando tandem res sua inclinare coepit? tum scilicet, cum discordiæ & æmulatio Syllam à Mario, Pompeium à Cæsare distraberent. Ita scilicet illa, *concordiâ res parvas crescere, discordiâ dilabi maximas*, digna est aurò, quæquè in animos mortalium imprimatur, sententia. Quæ sic communit civitates, ea quoquè familias ornat magnificè conjunctio. Habet suum quidem pretium & annulus aureus & gemma; nec gemma tamen ad digitum apta sine annulo, nec annulus tantum fulgoris habet ac pretii sine gemma: conjunctio utriusquè augescit ornamentum. Præclara sunt per sese Principis CAROLINÆ decora sua domestica: perquam illustria Senatoriæ gentis RZEWUSCIANÆ ornamenta: pulchrum fit, natam esse Ducibûs Exercituum Litvaniæ heroidem: par fuerit laus, editum esse parentibûs, Ducibûs Exercituum Poloniæ Heroem; tum singulares hæ luces tantæ secum conjungantur: quantum tibi ea conjunctio claritatem, quàm magnum pariet splendorem? Id hodie, vobis, Celsissimi Illustrissimiquè Sponsi, nuptias vestras ornantibûs, læti omnes suspicimus, ac de eo inter nos gratulamur. *Letamur omnes bonò patriæ communi, quod hæc conjunctio vestra, Litvanæ pariter Polonæquè, gentibus pollicetur;*

tur; hoc primum: gratulamur de vestra Societate ista, quâ sic Sponsorum, tam illustrium, tamquè suû similium animi coaluerint: hoc alterum orationis nostræ argumentum. Sic spei optimæ pleni, quod promittitis, cogitatione & animis præcipimus, ut de futuro tanquam præsentī bono gaudeamus: ita de hac vestra conjunctione gaudemus, ut multò plura, quàm fortuna nostra capere possit, excitati ad spem, præcipiamus animis.

Jam causas cum gaudii tum spei nostræ exposituros hac oratione; non illa quidem calamistrata, nequè ad tantum nuptiarum splendorem ornata, quin etiam ipsius insolentiâ lætitiæ perturbata adeò, ut verba mentem antevertant, pluraquè se, quàm ad rem sit opus, effundant; ex animo illa tamen profecta, excipietis, speramus, ea benignitate, Principes, quâ studiosos honoris vestri nominisque cultores accipiendos putatis. Hac bonitate freti, ideoquè orationis commendæ & commendandæ minùs curiosi, rem institutam persequimur. Favete, oramus, nobis etiam inter hos è bellicis machinis tonitrus, inter istas gratulantium voces Procerum & populi acclamationes festas, nostra officia profitentibus; dum læti ista felicitate tum patriæ tum vestra tum nostra plauditis.

PARS PRIMA.

QUod de gente Romana, dum è collecta Pastorum manu gens excitaretur nova, civitatis imperaturæ parvâ jacerentur fundamenta, urbs parva parvis circumdaretur moenibûs ac vallīs, tum ducerentur coloniæ, Tribus ac Magistratus constituerentur, memoriâ proditum est; eam nimirum

rum ductu conditoris sui & consiliò, cum Sabinis vicinæ sibi Provinciæ populis societatem atque amicitiam imprimis instituisse propterea: quòd homo ille ad tantam gentem, quanta olim Romanorum esset, condendam natus, ac propterea mira quadam (quod credere pronum est) ingenii sagacitate præditus, quid è Republica esset, prudens intelligeret: Regna scilicet hoc pacto maximè sustineri firmariquè, firmata amplificari, amplificata ad summum provehi; id de nostra Republica literis consignatum legimus, atque adeò nostris oculis usurpamus: scilicet Romanos cum Sabinis, auctore Romulo, cum Litvanis Polonos, VLADISLAO JACELLONE Duce, in unam gentem convenisse. Et verò quemadmodum Romanis conjunctio illa ad maxima rerum suarum valuit incrementa, ita Polonos inter Litvanosque inita societas utilis adeò & opportuna extitit, ut gens utraque, collatis in unum viribûs, nulli non hosti metum injecerit, finesque suos majorem in modum amplificaverit. Hinc quoties nos suavissimos conjunctionis istius fructus in mentem nobis revocamus, toties ad laudem Majorum; quorum operâ perfectum id esset; ipso monitore animo grato, excitamur. At si modum etiam rei gestæ consideremus; simili planè pacto apud Romanos cum Sabinis, atque cum Litvanis apud Polonos, amicitiam stabilitam firmatamque esse comperiemus: conjugii scilicet illinc atque hinc gentes in unam soliditatem convenisse. Sabinas ad conjugium invitabant Romani; exemplum proditurus civibus Magnus ille Litvaniæ Princeps JAGELLO HEDVIGEM Poloniæ Reginam matrimonio sibi adjunxe-

adjunxerat: cūquē inter Principes gentis utri-
usquē ita convenisset; gens quoquē altera in al-
terius jura atquē Societatem adscita est, atquē
asserta. Nec satis visum est semel tantū societa-
tem istam conjugiorum fœdere instituisse; sed etiam
atquē etiam iisdem pactis censebant esse confir-
mandam. SIGISMUDUS ille AUGUSTUS, JA-
GIELLONICÆ olim in Polonia rerum Regniquē
potientis Domūs ultima, ut vocant, scintilla, sicut in
celebri illo utriusquē Gentis conventu Lublini in-
stituto Litvaniam suam conjunxit cum Polonia,
ita ad eam quasi certissimis quibūsdam præsiidiis con-
firmandam BARBARÆ RADIVILIÆ nuptias ex-
petiit. JOANNES item Rex SOBIESCIUS, quem-
admodum commodorum publicorum studiosissimus
erat, ita conjunctionem eandem conservatam reli-
giosissimē voluit. Hic MICHAELI Principi RA-
DIVILIO Sororem suam lectissimam; quod & sibi
utile atquē decorum esse, & ad Rem-publicam plu-
rimum facere sapientissimus Princeps videret, in ma-
trimonium collocavit. Quod igitur olim actum esse,
cum summa jucunditate lætitiaquē commemoramus,
nunc ferē oculis usurpamus. Digna, quæ Regibus
nubat, RZEVUSCIO sponsa legitur RADIVILIA:
dignus ad quem regia deferantur insignia, Sponsus
RADIVILIÆ offertur RZEVUSCIUS. O felicem
Poloniam cum Litvania! O quicunque Patriam, e-
jusque commoda amatis cives, cogitate, quæso,
quanti sit ad felicitatem publicam, quanti ad confir-
mandam utilissimam juxta atquē omnibus bonis longē
jucundissimam gentis utriusquē conjunctionem, ad
vires ejus augendas: duas illas tam amplas, Poloniæ
alte-

alteram, alteram Litvaniæ, gentes in unam commi-
grare: Familias tam potentes, tam illustres Prosapias
secum conjungi: RADIVILIAM scilicet nubere
RZEVUSCIO? Est sane, quod vobis, est quod
Patriæ vestræ gratulemini, faustissima hac Famili-
arum istarum conjunctione, ad Patriam ab externa
vi defendendam, ad pacem interiorem civiumque
tranquillitatem suos intra limites retinendam, ad re-
stituendum pristinum Regno decorem atque inte-
gritatem ingens robur, auctoritatem summam, sum-
mamque potentiam comparari. Si enim ex magna-
rum rerum conjunctione, magna consurgit vis ac
robur, ecquis non videat, quantam utrique huic Fa-
miliæ & felicitati patriæ ex hac consociatione stabi-
limenti sit ac firmitatis? Ac primum quidem *Sponsæ*
Celsissimæ Familiam, generisque claritatem si confide-
res; profectò tantum illam inter cæteras eminere,
quanto superiores videas cedros virgultis, montes
collibus, colles convallibus. De qua nobis dicere in-
gredientibus nimium quantum difficultatis ipsa re-
rum objicit copia ac magnitudo. Ad originem hu-
jus animos advertemus? Perstringet mentis aciem
ingens ille splendor dignitatum, quo fulgent tot è
gente ista Proceres, lumina patriæ clarissima. Res
ab illis domi gestas spectabimus? quot foris bella feli-
cissimè ab istis confecta! Fortunas opesque æstimabi-
mus? multò clariora continuò alia, animorum scili-
cet decora admiranda se offerent. Amplitudinem
meritorum in Patria, partamque rebûs gestis glo-
riam loquemur? interpellabunt illico alia atque
præclara horum famæ præconiis pervulgata. Amo-
rem Patriæ curasque boni publici prædicabimus?

Reli-

Religio ac liberalitas suarum nos laudum simul ad-
monebit. Nihil omnino reliquum est nobis ex o-
mnibus hujus Familiae ornamentis, quod aut cele-
bratum adhuc non sit, aut non hodiequè hinc illinc
laudibus commendetur. Id quod ipsum etiam
repetere gratum est longioremquè ea de re contexere
orationem; quæ & ornatissima semper exstitit ac
immortalem meruit memoriam, & novis etiam nunc
splendoribus augeatur, cujus honore atquè majesta-
te verba ipsa, quibus eam exornare contendas, or-
natissima efficiantur. Solet hoc non rarò evenire, ut
qualis fuerit solis exortus, talis quoquè, serenus ni-
mirum aut tristis, dies contingat: & ideò fieri sæpè
videmus, ut homines nonnulli ad Solem orbi se in-
fundentem obtutus suos advertant, & ex eo diem
venturum metiantur. Id quod in fluminibus etiam
observare consuevimus, ut, cùm eorum magnitudi-
nem aliasquè qualitates singulares, illis adjunctas, ad-
miramur, caput illico atquè originem, è qua aquæ
illæ enascantur, quærimus, ad fontem ipsum mentem
referimus; nimirum fluvios ingentes, mundam pu-
ramquè undam pleno semper vehentes sinu, non ex hu-
mili aliqua palude, sed è fonte nobilissimo atquè fæ-
cundissimo proficisci. Ita planè, cùm nos RADIVI-
LIORUM sanguinem, velut fluvium quemdam
vastissimum, ad eam magnitudinem videmus devenis-
se, ut non modò universam Poloniam atquè Li-
tvaniam irrigârit, sed ad alienas quoquè processerit
terras, atquè ad ipsos terrarum Dominos penetrâ-
rit; quæ nam & quanta exordia ejus fuerint haud
difficiliter conjicere possumus. Cùmquè Domus hæc
amplissima tantis sit circumfusa splendoribus, ut

cum medio die de luce contendere videatur; quàm illustrem exortum habuerit, planum est, cuique intelligere. Quicunque cognitione rerum nostrarum vel leviter sunt imbuti, ac in processibus Litvanæ gentis vel mediocriter versati, ignorare sanè non possunt: **RADIVILIOS** ad Duces Litvanæ potentissimos natales suos suaq; incunabula referre; at suamet Ipsorum voluntate, publicæ utilitatis amore, ac moderatione quadam admiranda, studioq; cum iis Patriæ Civibus, supra quos nativâ gloriâ longè eminerent, æqualitatis ineundæ, cum Litvani Polonis accederent, honorificentissimum istum Principis Titulum abdicasse, ac pro nativo stemmate, (ut nobis dicitur) quòd Eis tanquam Litvanæ Ducibus, Eques armatus erat, **JORDANORUM** assumpsisse Tubas; quò nimirum, Principe ista Litvanæ Familiâ, ita Polonis adstricta atq; adjuncta, firmissima Polonorum Litvanorumq; conjunctio efficeretur. Non operæ pretium visum est, singula hic referre, quæ & cuiq; satis sunt per se cognita, & longam nimis conficerent narrationem, suis numeris atq; locis distincta referre, commemorare scientibus satis putavimus: quam Imperatores Romani **RADIVILIOS** Duces in Goniadz semel, creârint, ac iterum, lineâ illa exeunte, Nesvisiensium Ducum Titulò ornatos inter Celsissimos Romani Imperii Principes cooptârint: nempe ut quos Principes nasci contigerat, & esse æquum fuerat, eosdem Principes fieri, suisq; amplissimis meritis atq; virtuti id concedi, tantò honorificentius cuiq; appareret, quantò præstantius est, electione meritîsq; suffragantibûs ad dignitatem evocari, quàm ad eam cæca sorte, fortunæq;

næq; nihil ad virtutem, ad merita nihil respicientis
calculò, ad altos munerum honorumq; gradus pro-
vehi. Hic ego audire mihi videor Patriam novita-
te rei, ex dignitate hac nulli antea usitata, nonnihil
commotam cum RADIVILIIS hunc in modum ex-
postulare: Vosnè ornamenta foris quærere? Vos ali-
enîs titulîs atq; nominibûs censerî? Vos non sine
contemptu meo mutuari lucem splendoremq; apud
externos soles? Ego Vos, dum nasceremini, sinu ex-
cepi, exceptos complexu fovi dulcissimo, atq; nu-
trivi, nutritos liberaliter educavi, ornavi honoribûs,
fortunîs ac opibûs luculentissimîs cumulavi, ad sum-
mos dignitatum gradus provexi. Ita si fortè pa-
rum in Vos exstiti liberalis, atq; munifica, en, ait,
mea omnia vobis destino, omnia mea meq; adeò
ipsam Vobis permitto. Summa bellicæ rei ad Vos
erit deferenda? deferetur. Vos in Senatu primum lo-
cum obtinere est necesse? obtinebitis. à publicis ne-
gotiis maximisq; (quod vocant) Ministeriis Vos
esse oportebit? Eritis; fidem obligo. Ad Thronos
ipsoſ ascensus Vobis est dandus? dabitur: nulla in me
mora. Ite jam ingrati post tot favores Filii! Ite, DE-
OS colite externos, externos adorete Soles! Ite Vos
ego (quid enim dolor non audeat) dum nominis
mei fama in orbe exstabit, Vos ego! - sed vocem do-
lor intercipit, verba eximit, spiritum intercludit!
Quid verò est bona Mater, reponunt RADIVILII,
quod quereris? quid quod nobis tantopere indi-
gnaris? quid quod nos à te deficere; ad externa
transire signa, majorem in modum doles atq; cau-
sarîs? Itane verò; nos Patriam deferimus, quam ab
ortu jam inde nostro ita adamavimus, atq; cum vita

ipsa tantum ejus amorem infusum nobis sensimus, ut nihil sit, quò non eam potiore ducamus, ut vel lucis istius usuram infra eam longè esse positam arbitremur, quidquid possidemus opum atq; facultatum, quidquid virium ac potestatis in nobis inesse sentimus, totum id, nosq; adeò ipsos Patriæ devotos, atq; consecratos volumus. Ergone Patria suavissima, eam de nobis opinionem in animum inducere potuisti? Tu nobis non præstitam Tibi fidem objicere? Tu **RADIVILIOS** parum Tui studiosos queri, atq; dolere? Parvane nostri erga Te amoris extant documenta? Tibine consilio? Tibi manu ullo loco defuimus? parva sunt quæ pro Te gessimus? parva quæ sustinuimus? parva quæ de nostris facultatibus in Tua commoda erogavimus? Fabios illos Romanos in mentem Tibi, si placet, advoca, illisque instructa acie ad Veiens bellum, suas in copias suosque in humeros, Patriæ gratificandi studiò, susceptum procedentibus, **RADIVILIORUM** aciem ex adverso colloca, oppone Illorum facinus, tot celeberrimis istorum factis, semel & simul illi rem Patriæ suæ utilem, atq; summopere gratam aggressi, idq; consiliò tam improvidò, tam infelici exitu, ut in insidias hostium imprudenter inciderint, trecentosq; ipsos viros, omneq; adeo hominum genus, uno dumtaxat qui cladis acceptæ nuntius infelix testisq; posteritati relinqueretur, salvo evadente, una dies abstulerit. Isti, quamdiu nomen illorum stetit (stetit autem cum primùm Litvania florere coepit, ac præsertim cùm Poloniæ est adjuncta) quas res, quàm aditu arduas atq; difficiles, quàm exitu admirandas, quàm Patriæ utiles, atq; honorificas pace belloq; gesserunt?

runt? ista metire, accuratiùs singula tecum dispice.
Quid, non se tibi satis probârunt RADIVILII? non
satis bonos, tuîq; amantes filios se præstiterunt?
Ita fanè (quid enim mentiar) Patria subjungit,
cùm multos ego tales sinu meo amplectar filios,
quos mihi vel ipsa suis Camillis, Deciis, aliisq; cele-
berrimis viris superba invideat Roma; tum verò RA-
DIVILII ii mihi semper sunt visi, qui in paucis pri-
mi haberentur, tantòq; multis aliis præstarent, quan-
tò præ aliis multis in amoribus mihi fuerunt. Verùm
hoc est, quod nobis altiùs in animis infidet, hoc
quod nos vicem nostram graviùs dolemus: eos, tot
nominibûs nobis obligatos, tot præclaris sinceri erga
me amoris probatos testimoniis, fidem mutare. Cur
namq;, viri optimi, me meosq; honores tam parvi
æstimatis, ut aucupemini alienos? Aucupamur verò,
inquiunt illi: ecquos illos? Principum Romanorum
titulò aucti sumus; at honor iste invitis obvenit:
quid enim foris quæreremus, quod à Parentibus ac-
ceptum, boni communis studiò, ultro dimisimus?
vide sis Patria carissima, quemadmodum ad te ho-
nor iste redeat: ad tua videlicet attinet ornamenta,
tales te genuisse filios, quibus externi Principes tan-
tum habeant honorem, tantis illos ornent muneri-
bûs. Enimvero quod accepimus, tuis in thesauris re-
ponimus, non usuri oblati, quæ à dignitate tua fu-
erint aliena. Habes igitur RADIVILIOS tuos, tu-
um ad arbitrium maximè intentos. Consilium res po-
stulabit? his nemo id ad utilitatem Reipublicæ ac-
commodabit diligentius: ad arma res spectabit? ne-
mo illis aras tuas focosq; tutabitur certiùs: confici-
enda sunt tibi multis implicata difficultatibûs nego-
tia?

tia? conficient isti Consules Celsissimi: opem civium implorabis? primi subvenient tibi RADIVILII labore pariter atq; industriâ: afflictæ res tuæ sublevandæ? vita ipsa tuâ causâ in periculum conjicienda? conjicient, sublevabunt RADIVILII. Age dum, ut verborum fidem facta comprobent, ad rem attende diligenter. Utere, dum licet, horum felix caritate, fide, animis, sapientiâ. Tamdiu res tuæ stabunt incolumes, quamdiu hæc Domus Celsissima, decus præsidiumq; tuum, durabit. Neq; hæc laus tanta non amari potest aut esse sine præmio. Qui tam sublimis honoris gradus, in quo non RADIVILIUM ullum merita sua collocârint? quod illud in Republica munus vel ad nominis commendationem illustre, vel negotiosum ac difficultatibûs impeditum, quod non præclare Principes isti sustinuerint? Quæ cæteris superior est, eaq; difficilior, dignitas Senatoria, quàm hæc tum sacra, tum profana RADIVILIIS domestica? Quot in hac Domo Pontificum infulæ, Palatinorum curules, Castellanorum, Magnorum Ducum, Ministrorum statûs, insignia? Exercituum Litvaniæ Duces, Imperatores Clarissimos: quantus erit jam reliquus Præfecturarum census in hac Familia? Ut paucis absolvamus omnia, dixisse sit satis, nullum in Republica fuisse tempus, quò non præcipuis RADIVILII in Litvania fulgerent muneribûs: atq; ita illi quidem singuli omnesq;, magnis meritis suisulantibûs. Jam si ad ea, quæ ad vitæ honestatem, studiumq; publici boni spectant, animum advertamus: hæc nisi quis tam magna esse fateatur, ut ea, nullius eloquentia enarrare satis possit, ignarus omnino rerum, aut iniquus earum æstimator sit
oportet:

oportet: æquitatis studium tantum semper in illis erat, ut qui, nullo pacto, non spe lucri non ullius potentia metu, non amicitia incitamentis à recto unquam abduci potuerint; in maximis, quæ gerebant, muneribus, ut quisq; mereretur, aut poenam irrogare, aut decernere atq; largiri præmia, religiosissimum duxerint, vel ex eo possumus æstimare: quod ad nulla unquam sua lucra fuerint attenti: non aliud rerū gestarum operæ pretium rati, quàm egisse præclare. Imo; quod maximorum Principum est; quò magis sibi opes crescebant, eò magis fortunas suas despectabant: liberalius de suo aliis largiebantur: commune bonum impensius procurabant. Id prædicant tot locis Magnifica Musis posita domicilia, tot condita amplissima Collegia, tot DEO Divisq; colendis excitata ædes sacræ, tot Familiis religiosorum ordinum cænobia, gynæcea, excitata. Parum illud est hodie, si tot accessiones tantas spectes, quod de munificentia piissimorum Principum nostrorum JOANNES Deme- trius Solikovius Leopoliensium Archi-Episcopus, rerum Patriarum scriptor inclytus, monumentis suis annis abhinc centum amplius consignatum, reliquit: RADIVILII, inquit ille, *plus quàm trecentas in Polonia edificârunt Ecclesias: impleverunt spoliis hostium templa, aras aurô; per tanta fortunæ dispendia semper divites.* Idem prædicant, permulti cives illi Patriæ nobilitate clari, à RADIVILIIS opibûs aucti, gratiis & favoribûs ornati, ad honores & munera præclara provecti, multis nominibûs RADIVILIANÆ munificentia obligati. Sanè RADIVILII cùm & honoribûs maximis semper fulgerent, & magnitudine opum essent clarissimi; non cometas vanos, non igniculos minores,

res, qui Plebem terrerent, eiq; imponerent, se existi-
mârunt; sed qui velut magna sidera omnibus lucenter,
vigoremq; eis adspargerent, cives præfidiis suis te-
gerent, beneficiis foverent clientes, omnibus muni-
ficos se præstarent, Patriam summô studiô, omni of-
ficiorum genere prosequerentur; hinc tanta illis erga
Rempublicam fides, amor, atq; observantia, nunquam
ut adversus eam se commoverent, nunquam sibi in-
solitam ullam supra cæteros usurparent auctoritatem:
Regibus semper chari, apud cives maximè gratiosi,
omnibus amabiles adeò, ut Regum deliciae, amor ci-
vium, atq; æquiore jure, quàm illi Romani Decii,
Camilli, Augusti, Trajaniq;, Patriæ Patres dici & esse
mererentur. Jam si res armis gestas commemoremus;
quàm ardens sua virtus Martios inter ignes enituit!
quàm flagrans amor Patriæ! quoties illi hostium te-
lis invictum pectus objicere, quoties pulvere consper-
si, sudore perfusi infixæ in casside tela osculari, lætari
ex vulnere: quoties suis copiis vim belli sustinere, ex-
ercitibus suò præire ductu exemploq;, fortitudine ani-
mos addere, ad ardua excitare, aciem instruere, mira
celeritate bella conficere, vincere, triumphare. Te-
stis est Livonia SIGISMUNDO tertio ejusq; Filiis Re-
gibus victoriis **RADIVILIORUM** subacta: testis
Russia armis edomita: Ukraina, fuscis cæsisq;, Vala-
chis, Turcis, Scythis toties profligatis, parere Polo-
nis, coacta: profectò si in Republica ista consue-
tudo vigeret; ea, quæ apud Romanos à vocabulis sub-
actarum Gentium nomina Ducibus imponi obtinu-
erat, ut illi Macedonici, Cretici illi, alii Numantini,
Africani alii cognominarentur: non plura in Roma-
norum annalibus, quàm in **RADIVILIANIS** fastis
cogno-

cognomenta ac titulos legeremus; atq; ita Livoni-
cus iste, iste Rossicus, Turcicus ille diceretur; quan-
tumq; universa Respublica hostium numeraverit, tan-
tum trophæorum ipsa hæc Familia civibus haberet
ostentanda. Ita quidem RADIVILII & Patriam
præclaris virtutis suæ monimentis mirificè exornâ-
runt, & à Patria vicissim summis honoribus sunt co-
honestati, tantumq; decorum in hanc domum colla-
tum est, ut ex eo cumulo principes, quot quot sunt in
Litvania Poloniaq; Familæ, præcipuum splendorem
& ornamenta habeant, de suis quoq; ornamentis illi
vicissim tribuendo, domuiq; huic, velut dum auro ad-
ditur aurum, immensam propè efficiendo amplitu-
dinem. Quæ una est illustrissima in hoc Regno Fami-
lia, quæ non cum RADIVILIIS sit conjuncta? Huc
refer cognata illa affiniaq; Magnorum Principum no-
mina: ZBARASCIOS, GASTOLDOS, OSTRO-
GIOS, KOTLEROS, VISNIOVIECCIOS, SOBIE-
SCIOS, SANGUSCIOS, POTOCCIOS, ZAMOY-
SCIOS, BRANICCIOS, LUBOMIRSCIOS, ZA-
SŁAVSCIOS, SAPIEHAS, CHODKIEVICCIOS,
ZOŁKIEVICCIOS, JABŁONOVSCIOS, TAR-
NOWIOS, VANDALINOS MNISZCHOS, O-
GINSCIOS, TARŁONES, OPALINSCIOS, ZA-
VISZAS, TYSZKIEVICCIOS, VOŁOVICIOS, KO-
NIECPOLSCIOS, OSSOLINSCIOS, PACIOS, PO-
CIEJOS, BRZOSTOWSCIOS, &c. Quanta hæc in
RADIVILIANAM Domum cum istarum tantarum
tam illustrium Gentium laudibus, quàm augusta deco-
ra sunt collecta? Digni itaq; habiti sint RADIVILII,
quorum nomen in regias acciperetur Familias, junde-
returq; cum JAGIELLONIBUS per BARBARAM

RADIVILIAM, SIGISMUNDO AUGUSTO in ma-
trimonium elocatam: cum SOBIESCIS per sororem
JOANNIS III. MICHAELI RADIVILIO nuptui col-
locatam: cum VISNOVIECCIS & LESZCZYNIIS
Regio honore decoratis, per instituta conjugia: cum
Germanicis etiam Principibus Serenissimis: *Brandebur-*
gico Electore, atq; *Neoburgico Principe*, cum *Electore* item
Rhenano per CAROLAM LUDOVICAM BOGU-
SLAI RADIVILII Filiam, JACOBO JOANNIS
III. *Filio* semel atq; iterum, *Brandeburgico* scilicet vitâ
functo, frustra expetitam. Hinc, quod cuiq; primum
est intelligere, quâcunq; tandem istorum Principum
sanguis propagaretur, RADIVILIORUM quoq;
amplificaretur cognatio; ut id circo MAXIMILIA-
NUS Imperator in literis ad NICOLAUM, III hoc
nomine Principem, RADIVILIUM Palatinum Vil-
nensem datis, RADIVILIOS Fratres & consanguine-
os suos peramanter appellaret. Sed quod neminem non
summa compleat admiratione; cum ea sit humanarum
rerum conditio, ut eodem in statu perpetuò durare
nequeant, sed ea maximè, quæ maximè eminent, non
secus, ac cedri adversis sæpe ventis agitentur, aut velut
celsæ turres graviore impetu ruant, aut tanquam mon-
tes summi fulminibus sint obnoxii magis; ipsa RA-
DIVILIANA Domus, singulari quodam DEI immor-
talis beneficiò, facta adhuc tot sæculis tectaq; perdu-
rat ac floret. Corruunt alta, humilia surgunt, clara
extingvuntur, in lucem prodeunt obscura: Principum
nostrorum domus aut sola, aut inter paucas una pri-
mum constanter servat splendorem: in suo semper fa-
stigio suspicetur: fulget augeturq; præclaris honoribus,
Celsissima eadem tamdiu atq; illustrissima. Ubi nunc
sunt

sunt illi toto orbe inclyti, Græcorum Lycurgi, Solones, Epaminondæ? ubi Hæctores, Priami, Æneæq; Trojugeni? ubi illa Romana numina: Decii, Camilli, Bruti, Scipiones, aliæq; clarissimorum id genus virorum Familiæ? in ipsa Roma Romam hodie requiras: in Polonia Litvaniaq; nostra PIASTOS, JAGIELLO-
NES, VISNIOVIECCIOS, illos Regni nostri soles, totq; alia nomina præclara, quædam quasi Regni prima sidera, frustra quæsieris. Ipsi RADIVILII, Divis immortalibus proximi atq; simillimi: fortunæ easibus superiores, nunquam è suo felicitatis gradu deturbati, nunquam non opibus atq; honoribus summi atq; illustrissimi, vigent florentq;. In quo quidem domus hæc commune cum fluminibus id nacta est: quòd illa, quò longius progrediantur, eò magis aquis augmentur, magisq; amplificentur; ceterum id eis à fluviorum ratione diversum est; quòd, dum illi magnis intervallis à fonte recedunt, quam ex ipso limpitudinem acceperant, per intervalla cum aliis commisti fluentis, amittant: isti cum luce solis crescente, quò longius processerint, tantò conspectiores sint, magisq; fulgeant. Si ommissa prælonga RADIVILIORUM serie ad ipsos Parentes Sponsæ tuæ ornatissimæ animos adverterimus; facile longius à nobis posita in hac amplissima Principum gente contuebimur: Mater, Filia Principum, primi; Senatoris, Principi pariter, primo; Senatori, tantorum bonorum hæredi, tot nominum atq; ditionum amplissimarum Domino, Regio tum KORYBUTHORUM, tum LESZCZYNIORUM sanguine clara, insignis naturæ atq; Virtutis dotibus conjux, conjugii æqualibus omnino ornamentis commendato, Regiis SOBIESCI-

ORUM atq; JAGIELLONUM titulis conspicuo;
VISNIOVIECCIA juncta RADIVILIO. Cujus Prin-
cipis optimæ non possumus, inter tot etiam lætitiæ
præsentis causas, sine desiderio ac gemitu meminisse.
Commendabant illam Heroidum Principem omnibus
permulta, cognata sibi, comparataq; virtute decora:
ea mentis acies, animi magnitudo, rerum multiplex
cum humanarum, tum Divinarum etiam cognitio, ar-
tium ingenuarum in primis Pœticæ scientia & usus
Principibus commendabilis; quodq; cæteris longè præ-
stat, summaq; omnium est, in eo rerum humanarum
statu beatò præcipuum religionis studium, mira co-
mitas, propensa ad misericordiam voluntas, miseris
mortalibus tot tam illustribus exemplis approbata.
Quæ si magna sunt; ea quoq; quæ in magno Sponsæ
Celsissimæ Patre suspicimus & prædicamus, digna
forent, quæ, si fieri posset, singillatim recenserentur,
omnibusq; cum ad commendationem RADIVILLIANI nominis & Litvatiæ; in qua hic principem
locum obtinet; tum multis ad imitationem propone-
rentur. In primis natura Principem hunc tam liberali-
ter effinxit, ut nihil in eo desideres. Magnorum Ducum
viget in illo animus, par quibusvis regendis gentibus:
omni fortunâ superior; quem Justitia pariter & Cle-
mentia, Fortitudo & Moderatio, Liberalitas & Provi-
dentia, Pietas & Sapientia, possident teperantque. A-
mat hæc animi decora ipsa etiam, non amicissima ali-
oqui virtuti, Fortuna. Hæc quantis avitas Principis o-
pes auxerit opibus, nōrunt omnes, in primis illi, qui li-
beralitate Ducis nostri fruuntur, ejusq; bonis ditescunt.
Jam quæ, quantaq; illa, quæ à virtute profecta sunt?
Patere Princeps, nostram de te loqui infantiam.

Flo.

flores opibûs, fulgeat honoribûs, immortalem nomi-
nis famam jam diu habes comparatam, culmen felici-
tatis rerumq; expetendarum attigisti: maximam ho-
rum partem, oportet, virtuti tuæ referas acceptam.
Virtus maximos ad te collegit honores; Principem
locum in ordine Senatorum Litvaniæ cum summa rei
bellicæ potestate detulit: auctoritatem in Senatu, in
exercitu reverentiam, caritatem & observantiam præ-
cipuam apud Proceres civesq; Patriæ omnes tua tibi
merita pepererunt.

Princeps hujus tantæ dignitatis est causa tua
ipsius religio; quam, ut nos homuli taceamus, ipsa
templa Superûm & aræ, tuis, Princeps, impensis libe-
ralibûs seu condita, seu resecta, sive ornata: ipsa re-
ligiosis Familiis posita domicilia, instituendis ad ri-
tus sacros hominibus in Litvania Græcævicis Semi-
naria, alendis egentibus ptochotrophia, corrigendis
petulantibus domus disciplinæ salutaris: multa quo-
quæ ejusmodi alia disertius, quàm nostra prædicare
possit oratio, enuntiant. Quo pacto efficitur, ut,
te nobis præsentem, inclytos pietate Principes, Majo-
res tuos immortales, videre nobis videamur. Te con-
specto, reminiscimur continuo religiosissimorum il-
lorum Principum: RADIVILII Litvaniæ MARE-
SCHALLI; qui primus è gente sua cum Rege VLA-
DISLAO JAGELLONE pariter Christianis ritibûs
initiatum Cracoviæ, Divi Myrhensium Antistitis
NICOLAI adseivit sibi nomen, successoribusq; qui
ab se rectè descenderent, ordine illi & natu primi,
reliquit, atq; commendavit: NICOLAI PRISCI, Vil-
nensium Palatini, mariti filia Ducum Montvidorum,
VLADISLAI JAGELLONIS consanguineæ, magni
F
ejus

ejus ætatē & sapientia Litvani Nestoris, Vilnæ tem-
pli Divo Georgio, & domicilii Patribus Ordinis
Carmelici pii conditoris: NICOLAI III. Vilnensium
item Palatini, Litvaniæ Cancellarii, Principis S. Rom:
Imperii & Fratris Consagvineiq; sui à MAXIMILIANO
Imperatore titulīs aucti, viri religione & meritis
multis inclyti: GEORGII Cardinalis & NICOLAI
Ducis in Goniadz ac Medele; hujus Samogitien-
sium, Vilnensium illius & Cracoviensium; atq; AL-
BERTI primū Luceoriensis, deinde Vilnensis, san-
ctimonia commemorabili Antistitum: NICOLAI
CHRISTOPHORI Vilnensium Palatini, Parentis
nostri sanctissimi, & Pinscensium sociorum condito-
ris piissimi ALBERTI STANISLAI Magni Litva-
niæ Cancellarii; quorum res præclare sancteq; ge-
stas, posteritati litteris commendandas, conscribi-
mus: STANISLAI *Mareschalli* Litvaniæ, Duce Exerci-
tuum, Palatino Vilnensium, Nigro, nati, & hujus
germani fratris JOANNIS Trocensium, atq; ALE-
XANDRI LUDOVICI, Polocensium Palatino-
rum Præsidum: MICHAELIS Ducis Exercituum &
Procancellarii Litvaniæ, avi tui fortunatissimi: ante
alios Principum, insigni religionis studiō & Reipu-
blicæ inclytorum; quorum præter alia complura
monumenta, tum *Nesvisi* Divi Benedicti, tum in
urbe *Biała* Divi Basilii, sacra adoptione filiis, præci-
pua cænobia, commendant, immortaliterq; commen-
dabunt: tuorum, inquam, Princeps, Celsissimorum
Parentum CAROLI STANISLAI Magni Litvaniæ
Cancellarii, & ANNÆ SANGUSCIORUM Du-
cum Clarissimorum filiarum: horum, inquam, aliorumq;
quorum hic censum inire longum sit ac difficile; pi-

eta-

etatem, merita, beneficia, conspecto *Duce Palatino*
Principe nostro, grati, tantæq; pietatis amantes ac
reverentes, recordamur. Horum nobis Dux & Pa-
latinus Princeps noster, *Illustrissime Sponse*, horum, tam
DEI amantium Divisq; carorum, tam religionis am-
plificandæ studiosorum Procerum insignibûs pariter
meritis suis identidem excitat memoriam. Cum his
tantis laudibus pulchrè Domûs tuæ ILLUSTRISSIMÆ
gloria conjungitur; seu religionem erga DEUM spe-
ctemus sive pietatem in Patriam. Religionem in pri-
mis Catholicam, multis abhinc sæculis à Majoribus
vestris posteritati commendatam, tanta constanter
fide coluistis, ut, quod sciamus, nullus in Familia ve-
stra fuerit adhuc, qui difficillimis etiam Ecclesiæ tem-
poribûs ab ea descivisset. Quæ vestra istius pietatis atq;
constantis laus insignis admodum est, neq; cum
multis, bene etiam in Ecclesia meritis, gentibus com-
munis. Neq; eam fide vestra servastis tantum, sed de-
fendistis etiam adversus veritatis Catholicæ hostes,
ubi ubi facultas ejus tuendæ fuisset, dictis, consiliis, o-
pibûs, virtute singulari. Huic ipsi tutandæ, & com-
mendandæ civibus, aras, templâ, sacerdotum Colle-
gia, aliq; ejusmodi religionis propugnacula tot tam
multis locis à vobis sunt condita. Ejusmodi arces
habet Catholica pietas vestris opibûs exædificatas;
quales VENCESLAUS, Præses Podoliæ Palatinus,
Dux Exercituum Regni Parens tuus piissimus in urbe
sua *Zelechoviæ*: SEVERINUS Referendarius Regni,
Patrius tuus, in hæreditariis suis oppidis, Olesei &
Lenciæ: MICHAEL FLORIANUS Thesaurarius
Regni, Proavus tuus cum filia sua FEBRONIA,
JOANNIS KONIECPOLSCIS Siradiensium Præfidiis

Palatini conjuge lectissima, KONIECPOLII, & Ros-
niatoviæ DEO templa, Societati nostræ domicilia,
qualia alibi è Gente tua alii, Principes religiosissimi,
religionis munimenta, pietatis suæ monumenta im-
mortalia posuere. Pulchra sunt ea quoq; quibûs
Illustrissimorum civium istorum caritas se *Patriæ*
commendavit: officia scilicet tum togæ tum sagi.
In toga quàm illustria sunt munera, quæ vel in Tri-
bunalibus supremus Arbiter, vel in Comitibus Regni
generalibus Legatorum Præses, vel è conventu Ju-
dicum Radomiensi ad Regiam AUGUSTI Majestatem
Legatus, Procerum consultissimus idem eloquentissi-
musq; Consul, Palatinus hodie Podoliæ, Parens tuus
fortunatissimus, obiêrit: aut quibûs SEVERINUS
Pater tuus, Regni Referendarius, clarissimum il-
lud Regiæ Majestatis oraculum, toties in Reipublicæ
negotiiis legatus sit perfunctus: aut quæ Polonorum
ille Demosthenes, Avus vester Illustrissimus, STA-
NISLAUS, Præses Belsensium Palatinus, Magnus
Dux Exercituum, apud Imperatorem Bizantinum
Fecialis magna cum Polonæ gentis laudè sustinuerit.
Quis res pace præclare gestas sapientissimi Principis
JOSEPHI publicis officiis nunc frequentissimo culmæ
Procerum conventui, in gravissimo negotio disce-
ptantium, Præfecti, nunc Pocillatoris Regni, modò
Referendarii, mox Volhinienfium Palatini muneri-
bûs ornati, immaturò fatò, magno omnium luctu,
Patriæ nuper erepti, tum tot Magnorum ex hac gen-
te Senatorum, Ministrorum statûs, his atq; aliis ci-
vitatibus & Provinciis Præfectorum munera laudesq;
vel numerando percenseat? Non concedunt hic
arma togæ; quibûs ex hac Familia Heroes Ducesq;
inclyti

inclyti immortalem sibi suisq; posteris gloriam compararunt. Ex universa illa praelonga Heroum series, quoniam praeclaris omnium factis percensendis oratio nulla sufficit; duorum utiq; Bellatorum, quorum reliqui sint æmuli, meminisse sit satis. Primus horum; quem hac tempestate rerum maximè desideret Patria; **MICHAEL FLORIANUS RZEWUSKI**, Proavus tuus, Regni Thesaurarius, Patriarum Ductor legionum, multis inclytus victoriis. Quid non ille, amore Patriæ, boniq; communis studio, egit? quæ non fortunarum suarum vitæq; adiit pericula? quibus non feliciter cum hostibus pro aris focisq; confligit? Virtutem primò periclitatus suam, ductante copias, magnanimo illo Bellatore, **STEPHANO CZARNIECCIO**, adversus **CAROLUM GUSTAVUM Svecorum Regem**, apud Golembinum cum Duce suo pluribûs hostium millibûs cinctus, faucibusq; ex certamine, tanto animi ardore, tantaq; vi aggressus est hostem, ut, nomerò suorum multò inferior, obsidentes circum cuneos non modò perruperit, sed fuderit etiam, perculerit, dissipaverit. His tirunculus experimentis initiatus Marti, non dum etiam confirmata ætate, nihil deinceps ille, quod fubeundum esset, seu Religionis sive Patriæ causâ, existimare, perniciosum esse sibi, nihil arduum. Itaq; ad difficilia quamlibet certamina magnò se animò ultròq; Ducibus offerebat. Neq; ei tantæ fortitudini divina deerant consilia ac præsidia. Profundenda omnino sibi toties erat cum sanguine vita: cuiusmodi fuere pericula tum in Chotimensibus campis, adversus immanes Turcarum Tartarorumq; exercitus, ubi hic noster legionis suæ ductor, prima in acie objectus hostibus, vim omnem atq; impetum sustinuit:

it: tum apud Zaslaviam; ubi, jam summæ belli præfectus, præliò vicit, captumq; Barbarorum supremum Ducem abstulit Muradinum: tum apud Dunajevum, Mohilovum, Raskoviam, Zoraunum, Viennam, Strigonium, Zmurciam, Camenecum, Fontem Danielis, Zwanciam, Lopusnam, Szocavam, in campis Budziacensibus: his aliisq; compluribus locis, Divinò tectus præsidio, memoranda omni posteritati rerum à se gestarum reliquit monumenta. Defunctus tot tantisq; periculis, Religione defensa lætus Patriaq; plurium meritorum cupidus, cum in Budziacensibus arvis STANISLAI JABLONOVII Exercituum Ducis & JACOBI SOBIESCHII Regii Principis Collega strueret aciem, paralyti dissolutus, eodem pæne loco officiis amantissimi Patriæ civis Ducisq; fortissimi immortalus. Paternam virtutem factaq; MICHAELIS imitatus est auxitq; suis laudibus STANISLAUS, Belsensium Palatinus, Dux Exercituum Poloniæ Supremus, filius hujus MICHAELIS virtute simillimus, & ipse cum Illustrissimo Parente suo sub iisdem signis, Turcicorum, Sveticorum deinde Exercituum, præliis compluribus justisq; bellis, apud Calissum maximè, Varsaviam, & Petricoviam domitor, expugnator, multis celebratus præconiis, appellatusq; vulgò *Fulmen belli*. Hanc tantam tam eximiam laudem, quæ in te paterno manat sudore ac sanguine, aureo suo excipit flumine, diffunditq; in immensum Pactolus ille, in quem præcipua Poloniæ influunt decora, Maternus tuus Principum LUBOMIRSCIORUM Srzeniava. Hujus Gentis Celsissimæ qui claritatem nesciat, nihil ille unus lucis in Polonia, oportet, viderit. Si spectes imprimis prosapix istius dignitatem, omnes illa Principes in Pa-
tria

tria gentes complexa, Regibus atq; Principibus potentissimis per **THOFILAM** de Celsissima Ostrogiorum Familia **JOANNIS** tertii ex Sorore nepotem, **JOSEPHI LUBOMIRSCHII** Mareschalli Regni majoris conjugem, ejusq; ex hac conjugis Filiam **Tereciam** **Carolo** **Neoburgio** nuptui datam conjuncta, sicq; ad Reges ac Cæsares Principis istius cognatos propagata. Si honores respicias; **LUBOMIRII** Senatores: **LUBOMIRII** Ministri Primarii: **LUBOMIRII** in militia potestate summa conspici. Quot hic (ut alia non adducam) Castelanos Palatinosq; Cracovienses numeres, quot Regni Mareschallos, quot copiarum Duces! Si merita in Rempública consideres; nihil nisi publicum bonum in consiliis spectarunt: nihil, quò Patriæ prodesse intentatum reliquerunt: cum fortunæ dispendio, cum periculo vitæ murum se domi atq; foris pro Patria opposuere: militem suo ære Patriæ opportunum sustentavere: longas atq; difficilees sæpe suscepere legationes: omni ubiq; ope atq; contentione pro Patriæ commodis laboravere: pericula adiere: fudere sanguinem: vitam ei suam consecravere. Si studium divinarum rerum expendas; omnes illi quidem in maximis negotiis muneribusq;, in summa opum ac fortunarum abundantia, in potentia atq; auctoritate summa ita vitam instituere solent, ut Religionem omnibus rebus potiore ducant, ut nihil illis æquè ac religio cultusq; Numinis & virtutis Christianæ studium sit in pretio; tamen non paucos inter illos reperias, qui sanctimoniâ vitæ pietatisq; per omne genus exercitiis adeò eminuerunt, ut nè iis quidem, qui omnibus rebus à se abdicatis ad sanctitatem unicè incumbabant.

cedere viderentur. Quid verò? an in eis doctrinam desideres? quàm multi istius generis homines miratq; recondita eruditione floruerunt: quantus eis inerat amor studiumq; rei literariæ: quàm non leviter nec mediocriter aut ad speciem & vanam (ut fieri solet) ostentationem, sed liberaliter ac planè solidè eruditi, omni literaturâ exculti fuerint **LUBOMIRII**; tot libri ab illis scripti, tot volumina in lucem edita luculenter testantur. An consilium requiras? in hac certè Prosapia tot Viros admirabili ac planè divinò consiliò præditos reperiēs, quot non alibi facile invenēris. Quis etenim in judiciis cum summa laude versatus est? **LUBOMIRII**. Quis comitiis sapientissimè atq; è scientia omnium præfuit? **LUBOMIRII**. Quis in Senatu ita, ut authoritas loci munerisq; istius gravissimi postularet, locutus est? **LUBOMIRII**. Quis legationibûs, quis magnis muneribûs cum laude defunctus est? **LUBOMIRII**. Quis Patriæ consiliò subvenit? quis ei salutem attulit? Quis bella sapientissimè administravit? **LUBOMIRII**. atq; hic complures de gente **LUBOMIRIORUM** viros, à quibus ea, quæ modo diximus, gesta sunt, adducere oporteret. Sed quis eos omnes, quis de singulis illorum, non dico accuratè omnia enarret, sed summatim strictimq; aliqua referre queat? **SEBASTIANUS** ille Voynicensis Castelanus, qui **STEPHANO** Rege floruit, quàm fuerat in **DEUM** atq; in Patriam liberalis, alterum testantur ædes Divinæ magnificentissimè ab eo constructæ, ornatae atq; ditatae, alterum ex eo liquet, quòd Rege **STEPHANO** vitâ functo ad tuendos Patriæ fines, huicq; Regi, **SIGISMUNDO** jam subrogatò adversus Maximilianum Austriacum arma per Poloni-

loniam circumferentem, militem in sua stipendia scriptum, Patriæ suppeditavit, & ambobus istis Regibus, in Moschum alteri ad Livoniam, alteri ad Smolenscum contra eundem hostem magna mittebat subsidia: quod Scepusiensem tractum ingenti pecunia ab Hungaris redemit, ac Regno suo asseruit. Quàm multa pariter non levis momenti negotia in Republica confecit STANISLAUS Cracoviensis Palatinus, qui SIGISMUNDO tertio in vivis agebat! Ille CHODKIEVICIO comes contra Turcam, ac victoriarum socius aderat; tum, CHODKIEVICIO è vivis excedente, ipse Dux & Victor immanissimi hostis Osmani Turcici extitit. Tartaros postea cum Duce suo prædam in Polonia agentes profligavit. Morbò tandem impeditus id se vehementer dolere dictitabat, quòd Patriæ neq; manu neq; consilio, (en optimum Patriæ civem) prodesse posset; quod tamen, milite suis sumptibus afflictis tum Patriæ rebus suppeditatò abundè compensavit, & quod ad summa ejus ornamenta spectat, Principis Imperii titulum à FERDINANDIS binis sibi oblatum accepit, licet non induit. Quis demùm quantusq; vir iste fuerit, extat de eo honorificentissimum testimonium Pieglonii: *Patrem* (verba sunt illius) *egit Patriæ priusquam Filium exprimere posset. Patriam sub Chotimo Patriæ restituit, non major Regni propugnator quàm fidei; quot aras per Provinciam DEO, quot religiosis cænobia, tot suæ memoriæ mausolea fundavit. Eâdem in DEUM munificentia, copiis ad usus Patriæ magno sumptu sustentatis, fide ac observantia erga Regem JOANNEM tertium; à cujus partibus nulla vi ac persuasionibus abduci potuit, confectis publicis negotiis*

H

per

quàm celebris fuit ALEXANDER Cracoviensis Palatinus. Tum de GEORGIO Sebastiano Supremo Regni Mareschaleo, ac minore militiæ Regni Præfecto, quid ad ejus merita amplum atq; illustre afferri potest? Cùm adolescens extra Patriam ageret, à Philippo Hispaniensi annulò insigni, pro ea, quâ apud Regem floruit, gratia, est donatus; in Patriam mox ubi rediit, summa omnium voluntate, tanquam verus ejus Filius, cultus: Vladislao Regi, etsi in multis, quæ non è justitiæ lege ac non e commodò Patriæ videbantur (en viri constantiam) adversaretur, neq; ad ea probanda ullis muneribûs Regiisq; promissis adduci potuit, in paucis tamen carus; Turcis gravis, multisq; cladibûs eorum potentiæ illatis memorabilis: formidabilis RAGOCIO; Regi JOANNI CASIMIRO, cùm eum multi, Svecicâ potentiâ perterriti, desererent, ad signa hostis transfirent multi, usq; ad periculum fidelis, ac de CHMIELNICIO gloriosissimè triumphans, signaq; militaria ei erepta ad Regem afferens, imò etiam ex invidia malorum hominum iratum sibi Regem sentiens, ejusq; iram tam in se armatam cùm precibûs atq; officiis flectere non potuit, vi manuq; fortiter superans, Regi tamen supplex & obsequiosus ac in officio persistens. Non aliena à stipite poma digni Parente Filii: STANISLAUS supremus Regni Mareschaleus; qui tantum eruditione claruit, ut permultos non vulgaris sapientiæ libros publici juris fecerit; tantum prudentiâ atq; consiliò valuit, ut post multa irrita, eo Moderatore comitia optimè successerint; tantum apud Rempublicam acceptus, ut ab ea publicò ad Varsaviam agrò *Ujazdow* dictò fuerit donatus, tantum divinis rebus addictus,

ut

ut multas ædificaverit Ecclesias; binosq; homines mortuos, quos sepulturâ carentes sepeliri jusserat, hospites apud se (ut fama est) multaq; sibi de animæ immortalitate narrantes, ac pro officio Christiano gratias agentes, habere meruerit. Nec absimilis ei frater **HIERONYMUS AUGUSTINUS** Cracoviensis Castellanus Duxq; exercituum Regni supremus: qui & domi multa speciosa munera egregiè gessit, &, sicut ad Viennam insignia roboris atq; virtutis edidit specimina; ita in Vallachia triumphis inclaruit illustrissimis. Alter quoque frater, **GEORGIUS DOMINICUS**, Cracov: Palatinus, tum bellica laude adversus Turcas in Ukraina & Austria conspicuus, tum vel maximè præclaro facinore Torunii edito memorandus: ubi ille se pariter Divini honoris vindicem ostendit acerrimum, & animum suum, Senatore, eoq; **LUBOMIRIO**, dignum monstravit; dum neq; malitiosis hominum ab orthodoxa fide alienorum convitiis, neq; amplis Principum promissis ab æquitate moveri potuit, quin nimirum dignas sacrilega temeritate ab iis, qui Divinam Matrem contumeliâ gravî affecerant, pœnas expertierit. Bini jam illi fratres commemorandi nobis veniunt: **THEODORUS** Cracoviensis Palatinus vir multis laudibus ornatus; & **JOSEPHUS** Palatinus Czernichovien: summam & ipse laudem assecutus, **RZEVUSCIÆ SPONSI** fortunatissimi Matris optimæ parens lectissimus. Ad cujus porro Fæminæ ornatissimæ commendationem tantam, quantâ nullibi majorem requiras, satis dicere fuerit: quòd **LUBOMIRIIS** orta, quòd non nominis tantum sed & virtutis illorum hæres sit effecta. Utq; per multos **LUBOMIRIOS**; quos virtute summisq;

laudibûs egregie imitata est, non eamus; unam illam
Christinam GEORGII SEBASTIANI Marschalci
Supremi & minoris copiarum Præfecti filiam, FEL-
CIS POTOCCII Castellani Cracoviensis belli; Du-
cis supremi Conjugem, vivam in ea intueri videmur.
Pietate virtutisq; studio excelluit illa; excellit & ista.
illi acre planeq; divinum ingenium; & huic non
mediocre. animus illi excelsus gravitasq; magnifica,
& huic frons generosa orisq; majestas decora libera-
lis illi facies; & huic vultus ad lepores gratiasq; o-
mnes compositus. comitas illi mirifica; & huic affa-
bilis humanissima. in divos illa summopere libera-
lis; & hæc munifica. illa pulchrâ rerum in orbe ge-
starum notitiâ singulariter commendata; & hæc ea-
rundem non imperita: ut adeò de ea Salomonem lo-
cutum jure intelligas, ac de ea meritò dicere possis:
*manum suam misit ad fortia: manum aperuit inopi: excen-
dit palmas ad pauperem. & quod reliquum jam est: nobilis
vir ejus, quando federit cum Senatoribus terræ.* Imò verò
quàm nobiles utriq; SPONSI hodierni Parentes,
quàm nobile par istud sit, nemo est, qui planè non
videat. Nobile nominis amplitudine, nobile mayo-
rum gloriâ, nobile laudum suarum splendore, nobi-
le tot illustrissimarum Prosapiarum sanguine, ex u-
traq; parte, quasi ex fonte quodam uberrimo, magnifi-
cè se se efferente: ut adeò clarissima juxtâ atq; vetu-
stissima nomina: OSTROGIOS, WISZNIOVIECCI-
OS, SOBIESCIOS, RADIVILIOS, SANGUSCIOS,
SZENIAVSCIOS, LUBOMIRSCIOS, CZARTO-
RISCIOS, OGINSCIOS, aliosq; cum his conjunctos:
in RZEVUSCIANA Domo collecta pariter reve-
aris. Videant jam omnes, quanta sit RADIVILIANI
atq;

atq; RZEVUSCIANI nominis amplitudo, quanta nobilitas atq; potentia, quanta dignitatis similitudo & affinitas; atq; hinc intelligant: quantum felicitatis publicæ interfit, quanta Patriæ enascatur utilitas, quantum ei roboris & firmitatis accedat; Gentes istas tam amplas secum conjungi, RADIVILIAM RZEVUSCIO sancto matrimonii vinculo consociari. Quæ ut felicitas ista non minus ex propria SPONSORUM commendatione, quam ex Familiæ eorum amplitudine, in Patriam derivari, ostendatur; de propriis SPONSORUM laudibus, quæ multæ eaq; singulares ac paucis concessæ sunt, altera orationis parte dicere jam ingredimur; ut quàm magna ab iis ornamenta in Patriam proficiscantur, nobiscum reputemus.

P A R S S E C U N D A

Sententia eorum est, qui cælestium rerum naturæ contemplandæ atq; cognoscendæ dant operam, lunæ, eam inesse naturam, ut omni luce ex se sit destituta; illumq; quem rebus terrestribus, sole in alia aliqua mundi plaga (sive ille ipse cursu motuq; suo ad hanc illamve terræ partem deferatur, sive eo immoto, centrumq; mundi, obtinente, terra hac illave sui parte ad eum accedat) existente, impertit splendorem; à sole sibi nonnisi affusum commodatumq; habere. Etsi igitur non sua sed aliena luce Planeta iste fulgeat, merito nos tamen illum aliis rebus, quibus non idem concessum est, anteponimus, propterea: quod & Cælum mirifice exornat, & Terræ, rebusq; ejus omnibus summam utilitatem affert, lucem illis, sine qua surda cæcæq; omnia in tristissimo jacerent silentio, afferendo. At verò id ei maximopere est in-

commodum, atq; illiberale, quòd ex se nihil lucis atq; splendoris habeat; cùm enim ita à sole recesserit (quod statim orbis conversionibùs evenire solet) ut eum inter ac illam, media terra sit interposita, ignobilis atq; obscura latere cogitur, obscuritateq; sua non solum animantibus àërem pestiferum afflare, cæterisq; rebus in terra collocatis vitia non pauca afferre, dicitur, sed solem etiam ipsum, cùm se ei objecerit, obscurare. Rem planè similem in hominibus fieri videmus, usque ipso experimur. Si namq; filii nativum sibi splendorem inditum habeant à parentibus, magno id illis ornamento esse, nemo est, qui non confirmet. Quòd si in eis probitatis nihil, nihil præclari in rebus eorum gestis eluceat: si illi propriæ lucis nihil in se complectantur, atq; ab ea, quæ illis cum sanguine communicata fuerat, Parentum gloria, longè discedant; non tantum illi ipsi ignobiles atq; indecori vivent, terræ pondus inutile humi objecti jacebunt, verum Parentum etiam illustre nomen tenebris atq; obscuritate afficient, tantumq; Majoribus suis de luce detrahent, quantum ab eis, si in actionibus præclaris ipsi versarentur, claritatis in se proficisci, sentirent. Jam si ita se rem habere, nemo non planè comprobet, tum de te, Illustrissime STANISLAE, de Te quoq; CAROLINA Celsissima, Sponsi fortunatissimi, quid ex eo inferre quisq; atq; sentire debeat, luculenter omnes perspiciunt. Si namq; à Parentibus atq; Majoribus, universaq; Familia vestra, nimium quantum splendoris in vos derivatum est; quantum obsecro incrementum lux ista capiet, cùm vestra ipsorum ornamenta, velut ignibùs latè se porrigentibùs, novi quidam accedent ignes? Hæc verò quan-

ta quanta sunt, quæ certè maxima sunt in vobis decora, non vobis ipsis magis quàm Patriæ universæ honorem atq; splendorem efficiunt mirificum; non secus ac sol iste, quem videmus, purissimus, non sibi sed mundo universo lucem radiosq; adspergit. Sicut namq; horti floribûs, locis, pratîsq; circumjacentibus campi exornantur; ita ex hominibus illustribus Respublica decus suum nanciscitur. Et verò, si in quovis homine illud, quod ad decorem spectat, laudari solet vehementer, tum profectò majorem apud omnes meretur laudem, eoq; majore intuituum oculos complet admiratione, quo sublimiore in gradu, quo nobiliore loco ii homines, in quibus decor virtutisq; lux aliqua inest, sint constituti: ea plane ratione, quâ gemma quæpiam pulcherrima, atq; pretiosissima, & si præcipuum sibi à natura inditum habeat splendorem, multò tamen spendidior, oculisq; gratior accidit, cum in aureo annulo exornat digitum, quàm si loco aliquo ponatur humili atq; obscuro. Ergo jam, quò nostra spectat oratio, ut commonstremus, quantum decoris à vobis, **CELSISSIMI ILLUSTRISSIMIQUE SPONSI**, Respublica habeat, Vestramet ipsorum decora atq; ornamenta in medium sunt nobis adducenda; ut, quemadmodum flos flori, stella stellæ, gemma adjuncta gemmæ, pulchram jucundamq; oculis exhibet imaginem, ita vestrorum ornamentorum conjunctio Rempublicam ornatam mirificè reddat, atq; decoram. Quidquid enim in Vobis, veluti in magnis quibusdam luminaribus, decoris elucet; splendebit id in domibus, in Familiis conspicietur, spectabitur in foro, in delubris monstrabitur, in Filiis cernetur, videbitur in

civitate, in Regno demum universo eminebit; cum-
quē nominis Vestri amplitudine vestrarum laudum
atq; commendationum fama diffundetur. Quarum
laudum; quia & magnitudine sunt eximiae, & excel-
lentiā ac numerō propē infinitae; lineas in paginis
istis ducere, singulasq; verbis complecti, nec nostrae
est facultatis, nec rationi operis istius aptum atq;
conveniēns. Summam hīc igitur illorum ad tria ca-
pita referendam censuimus, ut ne nihil omnino di-
xisse videamur. Cū etenim in omnibus rebus, ar-
tibus praesertim ac disciplinis liberalibus, ita fieri a-
met, ut ille demum undequaq; perfectus, omnibū-
quē numeris absolutus evadat, cui, & quid quave ra-
tione agendum sit, rectē ab aliquo instituat, & vi-
a, quā ad praefixum scopum collineare, debeat, pro-
ponatur, & illi demum ipsi ad ea, quae optima visa
sibi fuerint, perficienda, idonea insit indoles, ac vo-
luntas ad id, quod didicit, opere complendum ala-
cris sit, atq; inflammata; tum in vitā, ad omnem ho-
nestatem instituendae, ratione, tria haec omnino sunt
necessaria: Educatio liberalis, idoneus ad praecleara
quaeq; amplectenda animus, voluntas deniq; ad ea
exercenda propensa, atq; inclinata. Ut itaq; ab eo,
quod primum hīc est, initium ducamus, quā libe-
raliter, **ILLUSTRISIME**, a Parentibus Tuis es in-
stitutus, dicere, an admirari potius nobis necesse sit,
non facile nobiscum constituimus. Noverant Sa-
pientissimi atq; prudentissimi Parentes Tui, cum Te
sibi datum esse Filium, qui olim civis Patriae futuros
esses: itaq; infantiam tuam sic informari curabant,
ut non tantum civis optimi partes explere, sed
Patrem etiam Patriae gerere ex aequo posses; ut, hone-
stissi-

stissimam vivendi rationem edoctus, & tuum nomen
immortalitati commendares, & Reipublicæ universæ
quàm maximò esses ornamentò. Noverant instituti-
onem educationemq; pueritiæ, fundamentum esse
omnis reliquæ vitæ tum publicæ, tum privatæ. No-
verant, mollem illam juvenilis ætatis ceram, quæcunq;
sibi vestigia impressa fuerint, fideliter, cùm severiori-
bus annis tenacitatem induerit, servaturam. Nove-
rant, teneram mollemq; plantam, quoquò demùm e-
am inflexeris, in eam partem, cùm robur aut pinus
procera fiet, pronam atq; inclinatam exstaturam.
Neq; tantum curabant, sed ipsi suismet manibûs pre-
tiosissimum hanc tractabant unionem; suum ipsi hunc
ocellum custodiebant: fingeant ipsi mores, atq;
virtutem docebant: ipsi infanti tenello animos, virò
dignos, inspirabant; ut adeò Catonem in filio educan-
do solertissimum atq; diligentissimum putares hunc,
illam Corneliam Gracchorum Matrem, in filiis cu-
randis atq; liberaliter instituendis solertissimam. Ni-
hil itaq; prius atq; antiquius habebant Parentes o-
ptimi, quàm ut primos illos tuos ætatulæ annos pul-
cherrimis modestiæ, verecundiæ, pudoris, Religionis-
quæ astringerent institutis; persuasum certumq;, a-
pud se habentes, talem Filium suum in reliqua vita,
talem in administrandis Reipublicæ muneribus fu-
turum, qualis sua educatio præcessisset. Ita sanè res est:
ex hoc etenim fonte, omnia vitæ profluunt ornamen-
ta, omnis in rebus atq; actionibus ornatus. Hinc con-
tra vim fortunæ præsidia petenda, hinc in adversis
fortitudo, hinc consilium in dubiis, hinc in prospe-
ris moderatio, hinc gravitas in incessu, in vultu au-
thoritas, in vultu habituq; frugalitas. Summò itaq;

studiô, omni ope atq; industriâ Parentes Tui operam
dederunt, ut iis formareris legibûs, iis institutis in-
struerere, quæ omne virtutis decus, quantum quidem
per ætatem licuit, præferrent, atq; adeo ut ad laudem
viri, summâ excellentiâ præditi, fingerere, hîsq; quasi
primis coloribûs ita tua formaretur ita comparare-
tur adolescentia, ut magni viri spem atq; expectatio-
nem omnibus exhiberet. At verò cum hîc sibi omnia
pro sententia votisq; evenire cernerent, cumq; ex un-
gue (quod ajunt) Leonem, exprimis iis, quæ du-
cta erant, lineamentis; cum Te suum Filium esse
cognoscerent, qui, si illorum non esses, illorum esse
merereris, cum è parvis illis puerilibus progressibus
omnes omnia bona pollicerentur, scirentq; Parentes
providi (quod Licurgus aliiq; homines in rebus huma-
nis non mediocriter versati scriptis sapientissimè tra-
diderunt) plurimum ad rem facere, ut ne juvenes o-
tia censectarentur, ac in desidiâ vitam extraherent,
nè primi illi, qui in vita humana omnium sunt optimi
(quod dicit Virgilius: *optima quæq; dies miseris morta-
libus ævi prima fugit*) anni diesq; nullo commodo
atq; enolumento abirent, in omni optimarum disci-
plinarum genere instituendum te, cum jam ætas &
indoles artes severiores ferebat, optârunt. Hunc itaq;
in finem optimos quos viderant, omnium conquire-
bant magistros; rogabantq; eos atq; hortabantur
impensè, ut Filium, tanquam pretiosissimam rem, fi-
dei suæ commissam, custodirent, optimis præceptis
imbuerent, ad id, quod honestum est, ardore sum-
mo, atq; cupiditate inflammarent, in honestæ rei o-
dium atq; horrorem, dictionis cum solutæ tum nume-
ris astrictæ vim atq; præstantiam, edocerent, natura-
lium

lium rerum cognitione imbuerent, rerum in toto orbe, in Patria præsertim gestarum notitiam ei compararent: quas in partes mundus sit divisus, quæ ubi jaceant terræ, maria, fluminaq; diffundantur, quæ & ubi posita sint Regna, quæ in regnis civitates, in civitatibus leges ac disciplinæ vigeant, doctrinam illi traderent, Patriæ instituta in animum illius insinuarerent, linguarum cum Gallicæ atq; Italicæ tum præsertim Latinæ atq; Nativæ elegantiam combibere eum facerent. Hoc illi à magistris contendebant: hoc inculcabant filio; hoc, ut filius summò studiò prosequeretur, monitiones addebant, ostendebant præmia pretiumq; positæ in discendo operæ: hoc ut Præceptores præstarent, munificentia eos sollicitabant, gratiasq; illis summas non habebant tantum, sed & referebant liberalissimè, opes omnes infra filium longè ponentes, easq; non propter aliud quid magis, quam ut in filios ita profunderentur, obvenisse sibi, aut amantes. Hujus rei causâ, ut ne Filius, domi delitescens, domum tantum cogitaret, ad opulentæ Domûs splendorem, ad favores Patris, ad Matris amores respiceret, suis eum ab oculis divellunt, Varfaviæ in publica luce collocant, Viris integerrimis in disciplinam tradunt, eodem cum aliis tectò, mensâ eadem, iisdem legibûs vivere, iisdem artibûs institui volunt. Tum ibi non mediocriter excultum, in literarum studio, in morum institutione, in cognitione rerum naturalium liberaliter versatum, non ad otia atq; quietem jam se recipere, non in studio cursuq; cessare, sed quasi juvenem solem ulterius progredi, diversas Regiones adire, Galliam, Germaniam atq; Italiam invisere, multa diversarum gentium instituta, multosq;

hominum atq; populorum mores cognoscere, con-
discere varias regendarum Urbium atq;, Provincia-
rum rationes, Rerum-publicarum ritus varios intu-
eri jubent. Ita quidem cum STANISLAO sui, non a-
liter, quoq; sui cum CAROLINA Parentes. Cogi-
tabant illi, singulari quodam DEI immortalis bene-
ficiô & numerosam & egregiam sibi prolem con-
cessam. Neq; satis se Parentes esse arbitrabantur,
quod prolem genuissent; Parentum officiô ritè se de-
functuros rati, si, quibus vitam dederunt, eisdem id
quoq; bene vivere possent largirentur. Cogitabant, rie-
licturos se illis fortunas, opesq; luculentissimas, sed
simul ad illam Critolai libram animum advertabant;
in qua homo sagacissimus, cum hinc animi illinc cor-
poris bona imponeret, tantum illa his pondere præva-
lere putabat, ut terram universam & maria omnia
deprimerent. Cogitabant, Filias esse suas, suo igitur
nomine; virtute sua dignam eis institutionem pro-
curabant, ac sicut ipsi & à natura, mirâ quadam so-
gacitate, mentisq; vi planè Divina erant ornati, &
ab industria optimis communiti præfidiis, ita prolem
suam quàm simillimam sibi efficere, conabantur. Id-
què ut cum maximè Mater illa Fæminarum lectissi-
marum Matronarumq; maximis ubiq; laudibus cele-
bratarum facilè Princeps, nihil non fecit quò Filias ad
omnem honesti atq; decori laudem effingeret. Pri-
scam imprimis religionem Christianæq; pietatis fe-
veritatem in animis earum insitam voluit, ea cogniti-
one mentem illarum primò imbutam cupiebat: quod
homines essent, quàm quod eis Principibus nasci
contigisset. Hinc aberat à mensa immoderatus luxus,
hinc à vestitu superbia, illiberalitas à jocis, hinc cul-
tus

tus severior, sermo innocentior, incessus modestior, occupatio quæ & Principem deceret, & puellam honestissimam, labore nonnihil atq; molestiâ innocuâ exerceret: Hinc frequens Divinarum rerum usus, comprecationes manè seròq; religiosissimæ, institui solitæ. In quibus omnibus cum CAROLINA mirè excelleret, mater lætabatur summopere. Cresce, agebat, ocelle mi, cresce, puellarum suavissima, ingens olim parentum solatium, summum ornamentum Familiæ, Gentis Tux hominumq; omnium atq; deorum delitiæ maximæ futura. Age, dicebat illa, o bona mater: tuis ego, dum vivam, vivam institutis: nullam nisi tuo ductu viam ingrediar: nunquam me à Tuo sinu divelli patiar: nusquam à Te nusquam à meis erga te officiis discedam. Sed ad esdum CAROLINA! Mater! tua! Quid illa? quid mater dulcissima? mene protinus ad se venire jubet? non sane negotii mihi aliquod imponit? haud istud quidem, illiberale quidpiam in me advertit? minimè verò. Quid tum? ut valet? quò utitur animò? num calamitatis atq; perturbationis aliquid ei accidit? Nihil minus. num infirmitate est afflicta? valetudine impedita? num curis atq; negotiis gravibus implicata? nihil jam illi curæ, doloris nihil potest accidere. Quid igitur, Deus immortalis! Ergo dicendum est? Dic age. CAROLINA, audis? Ut cum diligentissime. Mater! Quid Mater dulcissima! Mater! vixit! Me verò miseram! me Filiarum calamitosissimam! Mater vixit? Eam mihi Matrem mors ademit, quæ me, ex quo primam lucem hausi, tam amanter nutriti, tam diligenter ad optimos mores instituit, tam accuratè erudit, tam religiosè ad pietatem composuit, tam apdenter ad decentiam omnem excitavit. Ea mater è

vivis nunc discessit; nunc, inquam, cum fructus aliquos industriæ atq; laboris in mea educatione collocati percipere deberet. Egone diem hunc tam funestum ac luctuosum, tam citò adventurum sperabam? Ego ne, mater, hunc fletum lacrymarq; inanes pro tuo in me studio, pro ærumnis meâ causâ susceptis, tibi rependo? Eò ne verba mea recidunt, quibûs affirmabam, futurum aliquando, ut tui anni graviores in sinu meo conquiescerent? Sic vota sic mea desideria corruunt, atq; labuntur miserè! O! Spes hominum fallaces! o vanas cogitationes nostras! o fortunam meam, statumq; acerbissimum summèq; deplorandum! Verùm desine plorare **CAROLINA**, vivet in te, quæ immortalem vitam vivere digna fuerat, mater Tua optima, vivet in ea, quam, cùm institutione optima, tum exemplis suis egregiis te edocuit, vivendi ratione. Quod enim illa tibi fideliter commisit, tu suscepisti ac conservâsti studiose, omniaq; ea, ad quæ nutu bonæ matris impellebaris, in animum alte demisisti. Tam felicem etenim nacta es indolem, tam bonum **DEUS** optimus maximus indidit tibi animum, ut nihil, quod bonum atq; laudabile est, non condisceres, nihil non summò studiò adamares, & continuò amplecterêre. Nihil enim assidue curæ, nihil ulla proficerent studia, nisi tu eo ingenio, ea, qua polles, prædita esses indole excellentissimâ, nisi subjectæ laudum scintillæ in Te invenirent, quò summum gloriæ splendorem excitarent. Etenim, nisi in eo, qui docetur, idoneus animus atq; indoles præclara insit; quidquid demum illi propones, quidquid inculcabis, surdo fabulam narraveris; & si omnia, quæcunq; possis ac debeas, accuratè feceris, nihil fecisti.

eisti; nunquam te obtenturum, ut aut ad lyram pinus
tibi choreas ducat, aut lapis malleis contusus duri-
tiam ponat, leonis aut aquilæ faciem induat, Æthi-
ops vel mille fontibus ablutus candidum aquirat co-
lorem. Agrum itaq; bonum, CAROLINA referebas;
qui commendata sibi multo cum fœnore restituere so-
let. In quo si illustrissimum STANISLAUM Tuum
tecum conferamus, æqualia omnia in te atq; in il-
lo videbimus. Quid enim in te ad summam excellentis
animi laudem desideratur? Quid deest in illo? quod et-
si animi dona, corporis ornamentis longè antecel-
lunt; tamen, ut rectè opinatur Plinius, magnis ani-
mis corpora divinitus præparantur, magnitudinis
illius, quâ præstant animi capacia. Unde, quis est, qui
in vobis non demiretur vehementer illam, quam Tuæ,
STANISLAE Illustrissime, & tuæ, CAROLINA Cel-
sissima, fronti natura inspiravit majestatem? Verum
cùm ad nullius animum, oculi nostri valeant penetra-
re, ex actionibus certè, quæ ab animis proficiscun-
tur, de cujusvis animi qualitate integrum est judicare.
Hoc itaq; si quis in vobis accuratius consideret, quis
fatis animorum vestrorum excellentiam poterit de-
mirari? Quæ in Te, STANISLAE, quæ in Te, CA-
ROLINA, vis ingenii? quæ judicii gravitas? nihil
est humanæ menti penetrabile, quod non vos inge-
nii acie penetretis? Quæ animi celsitudo cum demissi-
one ejus mirè consociata? hæc vos omnium homi-
num communioni ita commodat; ut voluntates stu-
diaq; eorum maxima vobis conciliet? illa supra homi-
nes ita vos evehit, ut res omnes infra vos positas esse
arbitremini. Non vos aura fortunæ, favores suos
vobis afflantis, abripit, non auri fulgor cupiditate in-

flammat: non splendor Nominis atq; Honoris despicientiam humilium ac notæ obscurioris hominum in vobis concitat? Quis impetus ardorq; voluntatis ad ea consecranda, quæ honesti atq; decori speciem præferunt? quæ commiseratio erga afflictos? quanta clementia erga oppressos? quæ erga omnes comitas atq; liberalitas? Omnia certè hæc cum in utroq; vestrum sunt simillima, tum certè summa ac maxima in ambobus. Sed fieri non rarò solet, ut, qui & à natura præclaras dotes acceperunt, & à disciplinis optimis liberaliter sunt instructi atq; exculi, vitiò suò conculcent omnia, omnia immoderatâ vivendi licentiâ turpiter commaculent, lucem illam nativam, ab educatione auctam atq; amplificatam, aut sub modio fœcordiæ ponant, aut vitiorum caligine obscurerent, obruant, ac penitus extinguant. A Vobis labem ejusmodi tam longè abesse videmus, quàm pulchrè indoli à natura ad bonum quodvis inflammatæ subjectos ab educatione igniculos, vestro studio ardentissimò, voluntate vestra ad lucem semper aspirantè, amplificatos, ac latè diffusos conspiciamus; ita, ut quasi divinitus de præsentì consociatione vestra longè ante edocti, ad id ambo conspiraretis, in id omne studium atq; industriam contenderetis, ut, quemadmodum generis claritate, cæterisq; cum naturæ tum fortunæ donis similes estis, ita moribùs ac præstantissima vivendi ratione pares efficeremini. CAROLINA, imprimis à morte Matris suæ lectissimæ juvenis admodum relicta, ita se in omni isto vitæ curriculo virginali cum pudicitia accuratè gessit, ut Parenti curam de se atq; sollicitudinem anxiam ac molestiam omnem ademerit. Et quamvis non deerant multa, tum quæ
puel-

puellam imbecillam terrere atq; affligere non leviter possent, tum quæ ad ludos solutiores provocare, ad levitatem, in tanta præsertim rerum copia, concitare; tamen ita illa moderabatur omnia, ita in omnibus rationem modumq; tenuit, ut nec ulla frangeretur molestia, nec lætitiâ ullâ insolentiùs efferretur; semper illa quidem alacri animò, facie læta, blando vultu suis rebus continenter instabat; severitatem tamen in omni agendi ratione ita coluit, ita sedulò & accuratè vitam suam instituebat, ut semper primam operam studiumq; rebus divinis impenderet. Nunquam illa divinæ rei non interfuit, nunquam sacerdoti verba pro concione facienti singulari attentione non adstitit. Sæpe illam prima lux in sacra æde salutabat, postrema sæpè domum inde reducebat. Videbant eam ac mirabantur vehementer parietes sacri aræq; divinæ humi positis genibûs, junctis manibûs, in pia precatione longas horas collocare, oculos mentemq; in cœlo defigere, totam Numine plenam ad Christiana sacra accedere: cùmq; omnes ex ejus admirabili virtute jucunditatem summam perciperent, ad pietatem mirum in modum inflammarentur; tum pauperes hominesq; id genus calamitosi ejus munificentiam, singularem ejus in ferendis illis subsidiis, in obsequiis exhibendis, in præstandis Christianæ charitatis officiis alacritatem experti sunt incredibilem. Quâ verò temperantiâ, quâ abstinentiâ ipsa vivebat? jejuniis se illa verberibûs item atq; inedia corpus suum afflictare, summa cautione, ne quid illiberale ex ore excideret, ne quid inhonestum ac indecens ad castissimas aures ejus perveniret, providere, ab inani verborum profluentia, ac mulieribus

usitata loquacitate abstinere, silentiō atq; taciturni-
tate (quod mulieribus præsertim summo est orna-
mento) oblectari, nec quidquam, nisi quod res & locus
ferret, quod ratio svaderet, idq; modestissimè dicere,
nunquam effusiùs ridere, rarò admodùm, idq; cum sum-
ma repugnantia, in publicum prodire; cùm tamen ad-
eò liberali atq; honesta facie splenderet, cum quadam
nativi candoris & ruboris svavitate, ut quicunq; eam
conspexissent, laudes ejus omnibûs præconiis com-
mendarent. Ita præditam non claritas generis, non
vestis splendida, non opulenta domus, non animus
excelsus ad despicientiam humilium etiam hominum
efferebat, æqualibus humanissima, benigna humili-
bus, in famulos liberalis, munifica in pauperes, erga
afflictos misericors, apud omnes summè gratiofa. At
qualis tandem putamus Parenti celsissimo fuit; qui-
bûs eum non officiis coluit, quo non honore, studiō
atq; observantiā demereri semper studuit, qua non
alacritate in omnibus ei morem gerebat, ad nutum se
ejus studiosè fingeat? Vellet Parens, præstabat Filia;
moneret ille, hæc, quid se vellet, expectabat: ille gau-
deret, lætabatur hæc atq; gratulabatur summopere:
infirmitas illum haberet, aut fortuna adversa preme-
ret, mærebat hæc, solatium quærebat, mæsto Parenti
aderat, divinitus opem implorabat, ita ut si sua res age-
retur, non magis pro ea laboraret. Hinc factum est,
ut eam Parens singulariter adamaret, gauderetq; ve-
hementer, eam se habere filiam, in qua nihil ad lau-
dem atq; commendationem desideres; quæ & vir-
tute cùm admirabili floreret, & quid quid, ageret, tale
omnino esset, quod genus ejus sublimè summè com-
mendaret, Parenti spem magnam faceret, illi verò
ipsi

ipsi honorem atq; existimationem incredibilem compararet. Etenim illa in agendo provida atq; modesta, illa in loquendo suaviter gravis ac verecunda, illa in omnibus studiis, in adeundis atq; confectandis rebus omnibus animò excelsa, mente subtilis, ingenio acuta. Quæ enim ejus studia, quàm honestæ res, quibus illa operam dare in delectamentis habuit? Libros ab ingenio, ab arte, atq; argumento commendatos perquirere, eos diligenter evolvere: multa ex eis exscribere, similia ab industria ingenioq; suo deponere. Bibliothecam elegantem construere, libris pulcherrimis exornare, in iis lustrandis dies fallere, jucundissimum illi atq; usitatissimum. Cor illi Numine divino inflammatum, subtilitatem ingenio Pallas ipsa inspiravit, vultui suavitatem, honorem fronti Gratiæ vivæ afflârunt. Ades nobis Illustrissime STANISLAE: te quoq; considerantibus ita multa sunt ea, quæ cum laude egisti, agisq;, ut cogitandum meritò sit, quænam laudum tuarum sine periculo possint præteriri, quàm necesse sit perquirere, quæ accurata dictione aut speciosa oratione debeant exornari. Cùm ea jam esses ætate, eaq; institutione, ut tibi ipsi rebusq; publicis vivere maturus viderêre; libertatem jam nactus, tibiq; ipsi relictus, non eam amplexus es vivendi rationem, ut otia voluptatesq; confectareris, ornareris splendide, custode remoto, gauderes equis canibusq; sed tibi, sive à somno excitatus ad tuas te accingebas occupationes, sive, die exacto, ad lectum concedebas, ea semper ante oculos cogitatio versabatur, ii mentem exagitabant stimuli, eos tu tecum ubiq; ferebas, iis indormiebas, natum te eo loco, quo Cælitum hominumq; oculis semper esses

expositus, iis te institutum disciplinæ, quæ tibi ad honestissima omnia viam monstrarent sternerentq; debere te imprimis Omnipotenti Deo obsequium, laudem honoremq; quam maximum; debere Parentibus majoribusq; tuis integritatem famæ nominisq;, quod illi facinoribus gloriosis acquisiverunt; debere. Reipublicæ, cui natus es, ea omnia, quæ ad salutem ejus procurandam sunt necessaria, debere tibi ipsi decen-
tiam statui nominiq; tuo convenientem ac bonam de te apud omnes opinionem. Hæc & alia ejus generis ita animum tuum pervaserunt, ut hanc aut similem ipse tecum disceptationem institueres: aut mihi in humili cum gregibus mortalium jacendum, aut cum severitate honesta ad virtutem virtutisq; præmia, famam laudemq; immortalem, connitendum. Quid? mene otio torpere? men, cum alii in pulvere decoro luctantur, palmam capiunt, in stadio cessare? nihil laboris honesti, poenæ nihil suscipere; cum alii certando coronas consequantur? Ite fluxarum rerum vanitates: ite ludi inanescq; joci: age anime: majora vulgò, majora iis, quos cum vulgo promiscuè humilia juvant, audeamus: ad gloriam, ad virtutem omni ope studiòq; contendamus. Quæ cum ita cum animo tuo constituisti, tum constituta omnia atq; in animo sapienter ordinata, adeò strenuè tantaq; cum integritate opere complevisti, ut egregia virtutum semina à natura atq; à nobili educatione domesticaq; disciplina tibi insita, labore, industriâ, diligentia sic à te culta fuerint, ut, quamvis illa uberes proventus reddiderint, multò tamen majores fructus ab iis, qui oculos in te convertabant, expectarent omnino; omnes enim in te non modo viam Parentis, Avi, Proaviq; tui

clarissimorum, quod diximus, in Republica virorum
imaginem impressam intueri videbantur; sed persua-
sum omnino sibi habeant; te omnino Illustrissimos
Majores tuos rerum gerendarum gloriâ æquaturum.
Quid verò aliud à tua florente ætate, sanctè ac sa-
pienter confecta, poterat expectari; cui fixum desti-
natumq; erat in animo, præclara semper ac magnifi-
ca mente concipere, ardua atq; excelsa moliri, &
in magnis atq; honestis rebus semper versari, omni-
aque ad laudem ac dignitatem referre, ut ita summæ
virtutis admirationem obtineres & ab omnibus,
qui te noverant, hominibus, talis ac tantus habe-
rere, cui maxima munera, maxima Reipublicæ nego-
tia ex æquo possent demandari, salusq; ejus tutò com-
mitti. Animum tu præprimis gerebas semper, ut ad
omnia summa factum, & summis omnibus majorem,
ita nulla ambitione tumentem; omnia quidem infra
se sita esse autumantem, non contemnentem tamen;
copiam rerum sibi quidem præstò esse cernentem; at
illis, illas opes Aristippi, quæ nobiscum etiam è naufragio
enatare possent, longè anteponentem; nullasq; præ-
stantiores divitias quàm illas, in quas, nec fortuna nec
mors ipsa potestatis quidquam habeat, quæ & in hac
vita summum decus adferant, & post mortem fa-
mam immortalem præstant, arbitrantem; illudq; cum
Solone dicere solitum: *at nos non commutabimus virtute
divitias*: suppetere sibi, quidquid sensum voluptatis ac
oblectationem explere posset non ignorantem, ast ab
omni eo, quod cum honestate virtuteq; non con-
sentiret, maximopere abhorrentem; longèq; magis
turpe sibi putantem, vitiis animum contaminari, quàm

corpus vestibûs sordidîs indutum, deformatum facie, squallore obsitum, confectum fame in oculis aliorum apparere: ideò se in editiore loco luceq; majori constitutum arbitrantem, ut virtus sua latius se diffundere atq; ab omnibus perspicui possit luculentius, ideò se majorem esse quasi planetam, ut magis benigna luce cunctos impertiret, magisq; cunctis prodesset. Tum te demum claritate Majorum posse gloriari, cum eorum facta fueris imitatus. Hinc tibi omnis vita non in temeritate sed in modestia ac verecundia, non in licentia sed in reverentia, non in puerilibus ludis sed in liberalibus disciplinis. Quodq; Cato Censorius, in diligentia Præceptoris optimi Chilonis parum sibi conquiescendum ratus, fecit, cum Filium ipse literis instituit, ipse cum leges Romanas cognoscere, jaculari, & arma tractare, Historiam Romanorum memoriâ tenere edocuit; id tu ipse tibi cumulatè præstitisti, & quorum initia ab educatione accepisti, ea usu, atq; exercitatione continuâ, familiaria tibi reddere studuisti. Quid enim? an de civili aliquid jure tuam fugit conscientiam? an cognitio rerum naturalium eruditionem tuam non commendat? nôsti tu res singulas definire, genera dispertire, perfectâ concludere, vera & falsa disjungere: nosti eleganter dicere, vim atq; sùavitatem in dicendo conjungere: monumenta tu veterum atq; omnem antiquitatem sedulò pervestigâsti, tu omnia, quæ de Patriis rebus sunt perscripta, diligenter evolvisi, accuratè condidicisti: tu Musarum domos ingressus, omnia illic excussisti, lucra inde ingentia reportâsti, utq; alia non commemorem, Pœticam sùavitatem liberaliter adeò degustâsti, ut confectâ

nuper

nuper Elegiâ, quâ mortem Reginæ nostræ optimæ
complorabas, Phæbo musisq; singulariter te amari
testatum feceris. Quid verò quàm sis in dispensandis
atq; aggrediendis rebus prudens atq; maturus, quàm
in agendo fortis ac svavis, quàm cautus ac severus ju-
dex verborum in loquendo, quàm in conversando
cum majestate jucundus, quàm carus omnibus, quàm
omnibus honoratus? nihil tu majori cum licentia di-
cere, neminem supereiliô elatô aspernari. tu colere
pietatem, religionem observare, amicitiam persequi,
divinis rebus constanter pieq; inhærere, tu honesta-
tem, tu virtutem summô studiô in omnibus spectare,
tu majores revereri, consiliis eorum modestè acquiesce-
re, in conviviiis rebusq; relaxando animo accomoda-
tis ad decentiam omnia exigere, ita te provide cautè
què ac si inter gravissimos senes Romanos te unde-
quaq; circumstantes, ac si inter severos censores in
te aciem oculorum intendentes consideres, te gerere;
semper quid quo loco ac tempore proferendum esset,
quid singulare, quid eruditum, quid ad rem accomo-
datum, quid te dignum dicendum aut faciendum ef-
set, cogitare: tu continenti labore florentem ætatem
tuam (quod Solon suos docebat) nutrire, nunquam
ab opere cessare, jam honestis studiis operam dare,
pulchra atq; utilia legere, scribere talia, quæ ingeni-
um ac eruditionem commendarent mirificè, in Geo-
graphia, Historia, Philosophia, Geometria, in dicen-
di arte jam soluta jam numeris astricta, jam in sermo-
ne Patrio, jam Latino, jam Gallico atq; Italico versa-
ri assiduè, jam exercitatione militari vires exercere,
bellorum simulacra, tum in pulvere instituere, tum in

charta, artem modumq, quatiendi muros, arces op-
pugnandi, invadendi castra, aciem instruendi, manus
cum hoste conferendi, conferendi signa signis, pila pi-
lis opponendi, instantibus resistendi, persequendi fu-
gientes, describere ac penicillò adumbrare; jam animi
corporisq; relaxandi causâ, cubilia ferarum intrepide
involare, si fugiant, in eas equò citatò invehi;
retia tendere, si incautæ morentur: omniaq; talia age-
re, quæ eum, qui & nobili locò natus esset, summè de-
eerent, & qui Reipublicæ curandæ natum se crederet,
ac ad ejus commoda procuranda totum se fingeret,
omniaq; sua referret, maximopere commendarent.
Et verò quàn pulchrum erga Patriam studium, quàm
egregiam ad eam protegendam navitatem atq; pruden-
tiam, quàm fæcunda semina lætas olim segetes editu-
ra in STANISLAO Grodna vidisti, cùm à Chelmen-
si terra summo omnium consensu ad comitia mitte-
retur. Quis tum de te, STANISLAE, omnium sensus
extitit? Quanta tuî imago omnium oculis se objecit?
Lieurgum omnes, omnes sibi Catonem proponerent,
sed RZEVUSCIUM satis erat cogitare. At si quis,
AUGUSTUS certè Rex noster optimus atq; feli-
cissimus, cui nihil prius aut antiquius est, ac in me-
rita singulorum solerter inquirere, eaq; dignis præ-
miis remunerari; virtutem tuam singularem, ad ma-
gnas res tractandas vim atq; alacritatem mirificam
tanti æstimavit, ut te Chelmenfis terræ Præfectum
magno assensu renuntiârit, in exercitu ad legionum
regimen generale designarit, majora atq; altiora, cùm
commodum foret, tibi munera delaturus. Et certè
nihil est tam altum ac eminens, quod non tibi Rex


ac Respublica sponderet, quod non tuæ virtuti ex æquo competeret. Si namq; nos tantum & spatii & copix ad dicendum haberemus, quantum voluptatis ac admirationis eo tempore, quo hîc Nesvisii es commoratus, ex tua incredibili in omni agendi ratione excellentia cepimus, & ad eam nobis identidem commemorandam alacritatis sentimus; cùm te profectò demonstraremus, in quo & divina quædam vis ardorq; ad omne honestum inflammatus luculenter elucet, & labor atq; contentio sedula in magnis rebus assiduè persequendis, nunquam te segnem torpere, aut otio finit consenescere; ut inde rectè de te judicare liceat: te magna omnia, & arduò atq; excelsò locò posita esse, non ignorare, & ad ea studiò nonnisi atq; labore perveniri posse, exploratum habere. Cùmq; præclara multa STANISLAUS noster monimenta hîc reliquisset, quibûs incredibilem sui amorem ac venerationem, pro ea, quam de illo concepissent, opinione, apud omnes promeruit; tum hoc præcipuè ad summam ejus laudem ac singularem commendationem spectare videtur, quòd eam sibi Virginem matrimoniò jungendam decreverit, cum qua nullas vel paucas admodum conferri posse non obscure perspiciebat. Quod ut obtineret, laborandum illi hac in re haud multum sanè fuit, ut enim ille in hanc nonnisi Virginem studia sua convertit, in qua summa omnia florere cernebat; ita hæc Virginum prudentissima atq; lectissima ita in eo omnia eminere considerabat, ita æstimabat omnia, ut si nubendum sibi esset. RZEVUSCIO non nisi nubendum censeret, sibiq; honestissimum duceret. Qua tamen in re, ea, utriq;


res omnes suas moderari confveverunt, usi sunt moderatione, nihil ut suo arbitrio decernendum sibi putarent, sed Parentum starent voluntate. Tum verò Parentes ita utrinq; conspirarunt, ita in conjunctionem prolis suæ consenserunt, ut si à Diis immortalibus tam huic quam illi parti conjugii eligendi optio concessa fuisset, utraq; nec meliorem nec se digniorem partem eligere potuisset. Et sane si rem diligentius consideremus, divinò non nisi consiliò id esse peractum deprehendemus. Erant multi qui CAROLINÆ nuptias, omnibûs quibûs poterant modis, certatim expeterent. Parens ipse Celsissimus mandatis non illis quidem imperiosis, sed suavibus blandisq; verbis impellere videbatur. Quamdiu mihi, inquiebat, filia nepotes negabis? quamdiu, dicebat Respublica, filios à te optimos expectabo? Ecquando tandem, famuli famulæq; vociferabantur, Dominam te venerari licebit? sine, reponebat CAROLINA, Parens dulcissime, tuo me adhuc subiectam esse imperio: sine Respublica, meæ me adhuc Virginitatis, cui immori vellem, honore perfrui: finite famuli famulæq; dum non Domina imperiis vos terreo, sed puella mitis atq; imbecilla in vestris recumbo manibus. Hæc quidem modestiæ, pudicitæ, ac continentiæ singularis certissima erant indicia ac desideria flagrantissima. his tamen tecta Fortunæ aut potius DEI ipsius omnipotentis alta suberant consilia, quæ si alicui inspicere liceret, sic illa dicere viderentur: expectet dignum se RADIVILIA RZEVUSCIUM, dignâ se RADIVILIAM expectet RZEVUSCIUS. hæc itaq; illi servabatur, crescebat ille huic. Ecce verò expectatione omnium eventu felicissimo impletam, gaudiis
sum-


summīs summāq; lætitiā cumulātā. ut enim de conjugio vestro fama percrebuit, quæ, Dii boni, omnes complevit lætitiā! Lætari homines, tecta domusq; exultare, fora plateæ RZEVUSCIUM ac RADIVILIAM sonare! urbes voluptate liquidissima perfundi! Provinciæ gaudiis omnibûs incedere, festivis plausibûs omnia, omnia faustis acclamationibûs fortunatissimos Sponsos CAROLINAM & STANISLAUM ingeminare, Regnum hoc universum Litvaniamq; fama de novis Sponsis pervadere, lætitiā quoq; comes ei adesse, ac, quocunq; illa, eò quoq; hæc penetrare. Quam quidem lætitiā late ubivis dispersam auditione tam avidè omnes accepimus, quàm ipsi cumulātè eam in nobis sensimus. sed parum est audisse, videre etiam licet. Videtis Sponsi ornatissimi quanta in animis omnium omnino hominum conjugium vestrum gaudia concitavit. Quid enim ista sibi vult celebritas? quid tam frequens lectissimorum ex universa plane Republica hominum concursus? Spectate omnes, singulos aspiciate: nonne ista in ore festivitas, hilaritas in fronte, in oculis jucunditas perpetua, animum incredibili gaudiō affectum luculenter testatur? Quid ni verò lætitiā insolita corda animosq; omnium incesse? quidni omnes, quicunq; ut veros germanosq; decet cives, publicis commodis sunt addicti, maximopere exultarent? quidni gratularentur Patriæ? quidni vobis, gestientibus animis adessent? quorum conjunctionem tanta, quod vidimus, publica consequitur felicitas, consequuntur summa commoda; cum binæ domus tam potentes, Litvana altera, altera Polona secum junguntur, sicq; communionem Gentis utriusq; arctissimò astringunt vinculo, augent po-

tentiam, robur ejus tantis confirmant præfidiis, quanta in duabus istis Familiis in unum convenientibus, esse posita nemo non videt. Cùm, inquam, Ducis Litvanæ Militiæ Filia Filio Copiarum Poloniæ Ductoris, cùm RADIVILIA jungitur RZEVUSCIO: consequuntur summa ornamenta; cùm in utroq; conjugum istorum, quos hodie dextras junxisse vehementer lætamur, singularis virtus eluceat, laus omnis summaq; insita sit commendatio: duo, comoda nimirum atq; ornamenta integram cujuscunque Reipublicæ efficiunt felicitatem. Te jam DEUS Optime Maxime, qui sapienter ac fortiter gubernas omnia, hominum res omnes dispensas, te omnes, quotquot Patriam amamus, eiq; tantam in conjugio isto felicitatem evenisse gratulamur, quorum alios non ætas retardavit, non valetudo, non sexus impedivit alios, ut ad commune gaudium convolare, ut Sponsos ornatissimos parvuli noscere, ostendere juvenes, senes mirari, omnes insolito spectaculo oculos, animos lætitiâ incredibili implere, studiosè quærerent: Te, inquam, omnes summis votis obsecramus obtestamurque vehementer, ut felicitati huic perpetuitatem addere ne deneges; ut SPONSI LECTISSIMI & sibi ad summam gloriam, & Patriæ ad maxima vivant ornamenta; sibiq; non absimiles pariter ac Patriæ longè carissimos nepotes videre mereantur.














Biblioteka Jagiellońska



std:0024630

